

2 Samuel

Ni amatapohuali techilhuía senquisa ten David huan itanahuatijcayo. Achtohui David quipixqui tequit quej tanahuatijquet san ipan nopa tali cati itoca tali Judá. Pero teipa elqui tanahuatijquet nojquiya ipan nopa tali ica norte cati nojquiya itoca eliyaya tali Israel. Huajca elqui tanahuatijquet ipan nochí tali Israel huan amo san nopa parte cati itoca Judá. Quemantica David monejqui quintehuis icualancaitacahua cati israelitame huan quemantica quintehui icualancaitacahua cati sequinoc tali ehuani. David itztoya se tacat cati chicahuac quiicneli huan quineltocac TOTECO. Nojquiya yaya itztoya se tacat cati huelqui quichihua huejhueyi tajtacoli. Pero teipa quitajtaniyaya TOTECO ma quita-pojpolhui, huan quiseliyaya itatzacultil huan sempa quitoquiliyaya TOTECO. Israelitame tahuel quiicnelijque David huan para nochipa quinequiyayaj ma monextis seyoc tanahuatijquet quej David.

2 Samuel quiipyá ome hueyi partes:

- 2 Samuel 1—4 David tanahuatía ipan Judá
 - 2 Samuel 5—24 David quinnahuatía nochí israelitame
 - 2 Samuel 5—10 David tatani campa hueli.
 - 2 Samuel 11—12:25 David huan Betsabé
 - 2 Samuel 12:26—20 Taohuijcayot huan taijyohuilisti
 - 2 Samuel 21—24 Itamiya xihuit David
-

David quicajqui para mijqui Saúl

1 Quema ya mictoya Saúl, David mo-cuetqui ipan ialtepe Siclag pampa ya tantoya quintzontamiltía nopa amalecitame huan nopona mocajqui ome tonati. 2 Huan ipan ne seyoc tonali, ajisco se tacat cati quisqui ten campa isoldados Saúl. Ya-ya quihualicayaya iyoyo tzayantoc huan motalilijtoya taltepochi ipan itzonteco pampa quipiyayaya hueyi tequipacholi. Huan quema ajisco campa David mohuijtzonqui ica miyac tatepanitacayot. 3 Hua-jca David quitatzintoquili nopa tacat:

—¿Canque tihuala?

—Na nicholotejqui campa toisraelita masehualhua tatehúaj —taninquili nopa tacat.

4 Huan David quiilhui:

—Techilhui taya panotoc ipan nopa ta-heuilsti.

Huan nopa tacat quinanquili:

—Miyac toisraelita soldados mictoque huan miyac cholojejtoque. Huan nojquiya mijqui Saúl huan iconе, Jonatán.

5 Huan David quitatzintoquili:

—Huan ¿quenicatza tijmatqui para mijqui Saúl huan iconе?

6 Huajca quinanquili:

—Na niitztoya ipan tepet Gilboa huan nopona niquitac para Saúl motatzquilijtoya ipan icuachoso. Huan monechcahuiyaj icualancaitacahua ipan tatehuijca carros. Nojquiya hualayayaj miyaqui taca-me ipan cahuayoyme. 7 Huan ipan nopa ta-lojtzí Saúl techitac huan technotzqui. Huajca nimonechcahui campa itztoya.

8 Huan yaya techtatzintoquili ajquiya na huan niquilhui para nieliyaya se niamalecita tacat. 9 Huajca techilhui: ‘Xihuala huan techmicti pampa tahuel nitaijyo-

huía, huan noja niyoltoc.' 10 Huajca nimo nechcahui huan njmicti pampa niquitac para ayecmo huelis itztos pampa tahuel cocojtoya. Huan njcili icorona cati quipxtoya ipan itzonteco huan nopa costi cati quipixtoya ipan imax huan nimitzhualiquilía ta.

11 Huan quema quicajqui nochí cati quijito, David huan nopa tacame cati itzto-yaj ihuaya quitzayanque iniyoyo pampa tahuel mocuesojoque. 12 Huan pejque qui-choquiláj Saúl huan itelpoca Jonatán, huan nopa isoldados TOTECO huan nochí sequinoc israelitame, pampa tahuel miyac tacame mictoyaj ipan tatehuilisti ipan nopa tonali. Huan mosajqui David huan ite-quipanojcahua, huan amo teno quicuaj-que hasta tayohua. 13 Huan David quiilhui nopa tacat:

—¿Canque tiehua?

Huan quinanquili:

—Na niseyoc tali ejquet, niamalecita.

14 Huan David quiilhui:

—Huajca ¿para ten amo timajmajqui timomatananqui huan tijmicti Saúl cati TOTECO quitapejpenijtoya huan quitequi-talijtoya?

15-16 Huajca David nimantzi quinotz-qui se soldado huan quiilhui:

—Xijmicti ni tacat.

Huan David quiilhui nopa tacat:

—Timquis pampa ta ica moseli tiquijto para tijmicti Saúl, nopa tacat cati TOTECO quitapejpenijtoya para elis tanahuatijquet.

Huan isoldado hualajqui huan quimicti ica icuachoso.

David quinchoquili Saúl huan Jonatán

17 Huan David quisencajqui se huicat huan huicac ten Saúl huan icone, Jonatán, cati mictoyaj. 18 Huan tanahuati ma quin-machtica nopa soldados cati ehuani ipan tali Judá. Huan ni huicat nojquia y mopan-tía ijcuilijtoc ipan nopa ama tajcuiloli cati itoca Jaser. Huan quej ni quijjtohua:

19 "Noisraelita icnhua, nopa tacat cati más yejyectzi tijpixque, mictoc.

Yaya cati achi más techmacayaya pa-quilisti quimictijtoque nepa huejcapa campa tepeme.

Quena, yaya cati más tetic huetzto.

20 Amo xiquinilhuica tocualancaitacahua cati itztoque ipan altepet Gat.

Yon amo xiquinpohulica cati itztoque ipan tianquis ipan altepet Ascalón,

para amo techhuetzquilise nopa filisteo sihuame.

Amo tijnequij ma techpinajtica nopa sihuame cati amo quineltocaj TOTECO.

21 Saúl mijqui ipan tepet Gilboa.

Huajca amo quema ma taquiyahui npona.

Yon amo quema ma onca ajhuechti. Ma ayecmo taelilti pampa npona mijqui cati motemamac.

Nopona mijqui Saúl quej se ten hueli tacat,

quej elisquía amo ya cati quitapejpeni Toteco.

22 Saúl huan Jonatán nochipa tataniyaj ipan tatehuilisti.

Inijuanti quinmictiyayaj inincualanca-itacahua, masque tahuel motemacayayaj.

Amo quema mocuetque ipan se tate-huilisti san ica inimax, pampa nochipa tataniyayaj.

23 Nuchi tojuanti tiquinicnelyayaj huan tahuel tiquinnequiyayaj.

Nelía se paquilisti para tiquinixmat-que.

San sejco nemiyayaj quema itztoyaj huan nojquia y san sejco mocaj-que ipan miquilisti.

Achi más chicahuac huelque motaloj-que que ne hueyi cuatojti cati hueli patani.

Elque más tetique inijuanti que se león.

24 Anisraelita sihuame, xijchoquilica Saúl cati yejyectzi amechyoyonti-yaya ica yoyomit cati morado quej motalilíaj sihua tanahuatiani.

Quena, Saúl quijeyecchijqui amoyo- yo ica oro,

huajca xijchoquilica.

25 Yaya cati motemamac ya mictoc ipan tatehuilisti.

Mijqui Jonatán ipan ne tepet Gilboa.

26 Nimitzchoquilía noicni, Jonatán,
pampa tahuel nimitzicneli.

Huan techicneli miyac nojquiya hasta
motaicnелиl quitani inintaicnелиl
sihuame.

27 Mictoque cati más motemacayayaj.

Ayecmo quinemiltiáj inintepos pampa
ya mictoque."

Quej nopa elqui nopa huicat cati David
quisencajqui para quichoquilis Saúl huan
Jonatán.

**Quichijque David tanahuatijquet
ipan tali Judá**

2 Huan teipa David quitatzintoquili TO-
TECO:

—¿Tijnequi ma niya para niitztos ipan
se altepet ipan tali Judá?

Huan TOTECO quinanquili:

—Quena.

Huajca David quiilhui:

—Ipan taya altepet niyas?

Huan TOTECO quiilhui:

—Xiya altepet Hebrón.

2 Huajca David yajqui huan quinhuicac
nopa ome isihuajhua. Se itoca Ahinoam
cati eliyaya se jezreelite sihuat huan nese
itoca Abigail cati achtohui eliyaya isihua
Nabal ipan altepet Carmel. **3** Huan nojqui-
ya quinhuicac nopa tacame cati nejnento-
yaj ihuaya, sese ica isihua huan iconehua.
Huan nochí yajque para itztose ipan alte-
pet Hebrón.

4 Huan teipa hualajque nopa tayacanca
tacame ten tali Judá. Huan quialtijque Da-
vid ica aceite huan quichijque tanahuatij-
quet ipan inital.

Huan teipa quilhuijque David queni-
catza nopa masehualme ipan altepet Ja-
bes ipan tali Galaad quitasojaque Saúl
itacayo huan quitalpachotoj. **5** Huajca Da-
vid quintitanqui tacame ma yaca quin-
ilhuitij ni camanali: "Ma TOTECO amech-
tiochhua miyac pampa anquitasojaque
nopa mijcatzi Saúl huan ica miyac amota-
icneliycayo anquitalpachojque. **6** Huajca
ama ma TOTECO amechtasoja. Ma amech-
ita ica cuali huan ma amechnextili cati xi-
tahuac. Huan na nojquiya nimechchihuilis

cati cuali por cati anquichijtoque. **7** Huaj-
ca ama masque ya mictoc Saúl, amotana-
huatijca, ximoyolchicahuaca, huan ximo-
semacaca huan ximotalica tohuaya pampa
nopa tayacanani ipan tali Judá techchijto-
que niinintanahuatijca."

**Is Boset quichijque tanahuatijquet
ipan tali Israel**

8 Teipa Abner, icode Ner, cati quinya-
canayaya isoldados Saúl quihiucac Is Bo-
set, icode Saúl, ipan altepet Mahanaim,
9 huan nopona quichijqui tanahuatijquet.
Huan itanahuatilis quiajsic tali Galaad,
Gesuri, Jezreel, Efraín, Benjamín huan
hasta nochí cati itoca tali Israel ica huejca-
pa. **10** Huan Is Boset quipiyayaya 40 xihuit
quema pejqui tanahuatía ipan tali Israel
ica huejcapa huan san huecjajqui ome xi-
huit. Huan nochí cati itztoyaj ica tatzinta
campa itoca tali Judá quitoquilijque Tan-
ahuatijquet David. **11** Huan David elqui ta-
nahuatijquet ipan tali Judá para chicome
xihuit huan tajco huan quipixqui ichaj
ipan altepet Hebrón.

12 Huan teipa Abner quisqui ipan tali
Mahanaim inihuaya isoldados Tanahuatij-
quet Is Boset huan yajque altepet Gabaón
ipan tali Judá campa itztoyaj iixhuihua
Benjamín, pampa nojquiya quinequiyaya
mocuilis nopa tali Judá para elis iaxca Ta-
nahuatijquet Is Boset. **13** Huajca quisqui
Joab, icode Sarvia, cati eliyaya nopa taya-
canquet ten isoldados David huan yajqui
ica isoldados quinnamiquitoj. Huan mon-
namijque campa nopa mantoc at ipan alte-
pet Gabaón. Huan isoldados David mocaj-
que ipan se nali, huan isoldados Is Boset
ipan seyoc nali nopa mantoc at. **14** Huan
Abner cati eliyaya itayacanca Is Boset qui-
notzqui Joab cati eliyaya itayacanca Da-
vid, huan quej ni quilhui:

—Achtohui ma motehuica san sequij
totelpocahua para tiquintachilise huan ti-
quitase ajquiya tatanis.

Huan Joab tananquili:

—Cualtitoc.

15 Huajca quintapejpenijque majtacti
huan ome telpoca soldados cati itztoyaj
ica David huan majtacti huan ome telpoca

soldados ten tali Benjamín cati itztoyaj ica Is Boset. Huan moixnamijque nopa telpocame huan pejque motehuíaj. ¹⁶Huan se se injuanti quitzoncalitzqui cati itztoya imelac huan mocalaquilijke inincuatamin cati huehueyac ipan inielchiqui cati itztoya iixmelac. Huan nochí nopa 24 telpocame mijque ica sempa. Huan yeca quitocaxtijque nopa lugar “campa tatequi nopa cuachosojme”, huan mocahua ipan altepet Gabaón. ¹⁷Huan teipa pampa amo aqui tatantoya, pejque tatehuíaj nelía chicahuac nochí isoldados David ihuaya isoldados Is Boset. Huan ipan nopa tonali isoldados David tahuel quintanque isoldados Is Boset huan inintayacanca Abner. ¹⁸Huan nojquiya nopona itztoyaj nopa ome iicnihua Joab, nopa tayacanquet ten isoldados David, cati mintoca eliyaya Abisai huan Asael. Huan Joab, Abisai huan Asael nochí eliyayaj iconehua Sarvia. Huan Asael tahuel hueliyaya motalohua chicahuac quej se masat. ¹⁹Huan yaya pejqui quitepotztoca Abner, nopa tayacanquet ten isoldados Is Boset, huan amo teno quicahuili ma quitzacuili. Amo quicajqui iojhui, yon nica, yon neca. San quitoquilijtiyajqui. ²⁰Huan quema Abner moicancuetqui huan quiitac para quitoquiliyaya, quiilhui:

—¿Amo ta tiAsael?

—Quena, na niAsael —quinanquili.

²¹Huajca Abner quiilhui:

—Ximijcueni. Xijtoquili seyoc nosoldado huan ximocahua ica nochí cati yaya quiipyi.

Pero Asael amo quinejqui quicahuas.

²²Huajca Abner sempá quiilhui Asael:

—¡Techcahu! ¿Para ten monequi nimitzinctis? Huan ¿taya noxayac ica njitalchilis moienci Joab quema sempá timonamiquise?

²³Pero Asael amo quitacaquili. Huajca Abner quisentapalhuili ica icuachoso cati huehueyac huan nopona huetzqui mictoc Asael. Huan teipa nochí cati ajsiyayaj campa huetztoya Asael moquetzayayaj ica tatepanitacayot. ²⁴Huan teipa Joab huan Abisai pejque quitoquilíaj Abner huan quema calaquito tonati, ya ajsitoyaj ipan

se tachiquili cati itoca Amma nechca Gíá ipan nopa ojti cati yahui para altepet Gabaón. ²⁵Huan mosentilijque miyac iixhuihua Benjamín para quipalehuise Abner huan moquetzque tachiquiltipa. ²⁶Huan Abner quinotzqui Joab chicahuac ica huejca huan quiilhui:

—¿Monequi nochipa tijsenhuiquilitjose timomictíaj? ¿Amo tiquita para tatehui-listi techhualiquilíia miyac tequipacholi? Xiquintacahualti mosoldados para ma techcahuaca pampa tiicnime.

²⁷Huan Joab quinanquili:

—Nelía cati nimitzilhuía, sintia ta achtohui amo tiquijtojtosquía ma tiquintapejpenica 12 totelpocahua para tatehui-se, amo oncatosquía tatehuilisti. Nochi nosoldados san mocuecosquíaj ininchajchaj ama ijnaloc.

²⁸Huajca teipa Joab quipitzqui cua-cuajti huan nochí isoldados David moquetzque huan ayecmo tatehuijque, yon ayecmo quintoquiliijke nopa sequinoc israelitame cati ejque tali Israel ica huejcapa. ²⁹Huan Abner huan nochí isoldados nojquiya nejnenque seyohual huan quiix-cotonque nopa tamayamit huan nopa hueyat Jordán huan nejnenque hasta ajsitoj ipan altepet Mahanaim.

³⁰Huan Joab nojquiya quinsentili isoldados David huan quinpojqui huan polihuiyayaj 19, huan iyoca polihuiyaya Asael cati Abner quimictijtoya. ³¹Pero isoldados David quinmictijtoyaj 360 cati mota-litjtoyaj ihuaya Abner, itayacanca isoldados Tanahuatijquet Is Boset, huan nochí eliyayaj iixhuihua Benjamín cati calactoyaj ihuaya.

³²Huan teipa Joab huan isoldados qui-huicaque itacayo Asael huan quitalpa-chojque nechca itata ipan altepet Belén. Huan teipa nejnenque seyohual huan quema tanestihuayaya ajsitoj ipan inialte-pe, Hebrón.

³Huan ica ya ni pejqui miyac tatehuilis-ti ica injuanti cati quitoquiliyayaj ico-ne Saúl huan cati quitoquiliyayaj David. Pero isoldados David achi más momiya-quiliijtiyahuiyayaj huan quipixtiyahuiyayaj más chicahualisti. Huan isoldados ico-

ne Saúl caxantiyahuiyaya ininchicahualis pampa quitahuelcajtiyahuiyaya.

Ya ni iconehua David cati tacatque ipan altepet Hebrón

(1 Cr. 3:1-4)

2 Huan nopona ipan altepet Hebrón tacatque iconehua David:

Iachtohui cone quitocaxti Amnón huan eliyaya icone ica Ahinoam cati eliyaya se jerezelita.

3 Iompa cone quitocaxtali Quileab huan eliyaya icone Abigail cati achtohui eliyaya isihua Nabal cati ejqui altepet Carmel.

Iexpa cone David quitocaxtali Ab-salón huan eliyaya icone seyoc isihua cati itoca Maaca cati eliya-ya iichpoca Tanahuatijquet Talmái cati tanahuati ipan tali Gesur.

4 Inajpa cone David quitocaxti Ado-nías huan eliyaya icone seyoc isihua cati itoca Haguit.

Imaculpa cone David quitocaxtali Sefatías huan eliyaya icone seyoc isihua cati itoca Abital.

5 Ichicuasempa cone David quitocax-ti Itream huan eliyaya icone seyoc isihua cati itoca Eglá.

Nochi ya ni eliyaya iconehua David cati tacatque ipan altepet Hebrón.

Abner mosejcotili ihuaya David

6Huan nochi nopa xihuit quema tatehui-yayaj isoldados David ica isoldados Tanahuatijquet Is Boset, Abner itayacanca Is Boset achi más mohueyimatiyaya. **7**Huan teipa Abner motemamac para cochis ihuaya se sihuat cati achtohui eliyaya iompaca sihua Tanahuatijquet Saúl cati ya mictoya. Huan itoca nopa sihuat eliyaya Rizpa huan eliyaya icone Aja. Huajca Tanahuatijquet Is Boset quitacahualti Abner huan quillhui:

—¿Para ten ticochtoc ihuaya cati eliyaya icahual notata, Tanahuatijquet Saúl?

8Huan Abner tahuel cuanqui ica cati Tanahuatijquet Is Boset quijito, huan quin-quenquila:

—¿Techita para se nichichi? ¿Techita nise mocualancaitaca quej cati ehuani tali

Judá? ¿Queniquetza huelis? Na nimitzchi-huilijtoc cati cuali ta huan motata Saúl, huan iicnihua huan ihuampoyohua. Na ni-hueltosquía nimitztemactilijtosquía ica David, pero amo nijnejqui. San nimitzte-quipano cuali, huan ama quej notaxtahuil, techtateluía para nitajtacolchijtoc ihuaya se sihuat. **9**Ma Toteco Dios techtatza-culti sinta amo nijpalehuiti David para ma quimoyahuas itanahuatilis hasta qui-ajsis nochí talme cati TOTECO quiilhuijtoc para quimacas. **10**Nijpalehuis mitzquixtilis ta huan ichaj motata Saúl nochí amota-nahuatilis ipan ni tali Israel huan nijchi-huas ma pano ica David hasta ya quinna-huatis nochí israelitame campa hueli ten tali Dan ica huejcapa hasta altepet Beerseba ica tatzinta.

11Huan Tanahuatijquet Is Boset amo huelqui quinanquili Abner pampa quiimacasiyaya. **12**Teipa Abner quintitanqui tacame para ma quiitatij David huan para ma quiilhuitij quej ni: “Nochi ni tali Israel nelía moaxca ta para tijnahuatis. Xijchi-hua se camanal sencahuali nohuaya huan techmaca nopa tequit cati nijnequi ipan motanahuatilis huan nimitzmaclilis momaco nochí tali Israel ica huejcapa.”

13Huan David quijito: “Cualtitoc, nij-chihuas se camanal sencahuali mohuaya, pero san se tamanti monequi. Amo nimitz-namiquis para ticamanaltise hasta tech-hualquilis nosihua Mical, yaya cati iich-poca Tanahuatijquet Saúl cati ya mictoc.”

14Huan nojquiya para nesis xitahuac, Da-víd quitajcuilhui Tanahuatijquet Is Boset huan quillhui: “Techmactili nosihua Mical pampa timosencajque ica cuali. Huan nij-taxtahui motata Saúl cati tajtanqui pampa quinejqui ma niquinmicti nopa 100 filisteo tacame huan nijchijqui.”

15Ama Mical ihuehue eliyaya Paltiel huan yaya eliyaya icone Lais. Huajca Tanahuatijquet Is Boset tanahuati para ma quicuilica. **16**Huan ihuehue yajqui ihuaya isihua huan chocatiyajqui. Huan quitoqui-lijtiyajqui nochí ojti hasta altepet Bahu-rim, huan nopona Abner quillhui: “Xita-cuepili mochaj.” Huan Paltiel mocuetqui ichaj.

17 Huan Abner quincamanalhui nopa huehue tacame ten tali Israel huan quinilhui: “Achtohui anquinectoyaj para elis amotanahuatijca David, **18** huajca ama ya ajsic nopa tonali para quej nopa ma eli. TOTECO quiijtojtoc: Elis ica imax David para niquinmanahuis israelitame ten nopa filisteos huan ten nochi sequinoc inincualancaitacahua.”

19 Huan Abner nojquiya quincamanalhuito iixhuihua Benjamín. Teipa yajqui altepet Hebrón quiitato David huan quillhuito nochi cati nopa tacame ipan tali Israel cati iixhuihua Benjamín quinequiyyaj quichihuase. **20** Huan yajque ihuaya Abner **20** tacame para quitatij David, huan David quichijqui se hueyi tacualisti para Abner huan cati ihuaya hualayayaj. **21** Huan teipa Abner quiilhui David:

—Na nimocuepas nimantzi huan niqinsentiliti nochi tacame ipan tali Israel para ma quichihuaca se camanal sencahualli mohuaya huan ma mitzchihuaca titanahuatijquet. Huan quej nopa tiquinna huatis nochi israelitame quej hasta huejcajquiya tijnequiyaya.

Huajca David quinahuatijtejqui, huan Abner yajqui ica cuali.

Joab quimicti Abner

22 Huan quema Abner sanoc onquistoya, ajsico nopa tayacanquet Joab huan isoldados David. Injuanti yajtoyaj ipan tatehuilisti huan quihualicayaya miyac tamanti cati quinceuiljtoyaj inincualancaitacahua. Huan Abner ayecmo itztoya ihuaya David pampa ya yajtoya ichaj ica cuali. **23** Huan quema ajsicoj Joab huan isoldados cati hualayayaj inihuaya sequinoc, injuanti quiilhuijque: Abner, ica Ner, quipaxaloco Tanahuatijquet David huan David quiseli ica cuali huan quema quinahuatijtejqui para yas, yajqui ica cuali. **24** Huajca Joab nimantzi yajqui quiitato David huan quiilhui:

—¿Taya tijchijtoc? Abner hualajqui mitz Paxaloco huan tijcahuiljtoc ma cholo tomaco. **25** Cuali tijmati Abner san hualajqui para mitzcajcayahuas. Hualajqui para quitachilis quenicatzá huelis calaquies ipan

toaltepe huan teipa sempa hualas techte-huiqui.

26 Huajca Joab quisqui iixpa David huan quintitanqui soldados para ma quiajsitij Abner huan ma quiilhuica ma mocuepa. Huan quiajsitoj nechca nopa ameli Sira, huan quiilhuijque ma mocuepa huan mocuetqui inihuaya nopa soldados. Huan David amo teno quimatiyaya. **27** Huan quema Abner ajsico campa icalte altepet Hebrón, Joab quiyyocauixti para camanaltis ihuaya ixtacatzi. Huan nopona Joab quicalaquili imacheta ijtic Abner huan nimantzi mijqui. Huan quej nopa Joab momacuetqui pampa quimictijtoya iicni, Asael. **28** Huan quema David quimatqui para quimictijtoya Abner quijito: “TOTECO quimati para na huan injuanti cati ni quinnahuatía amo tijhuicaj tajtacoli pampa quimictijque Abner cati eliyaya ica Ner, pampa amo teno tijmatiyayaj. **29** Yaya Joab cati quihuica tajtacoli ihuaya ichampoyohua. Amo quema ma polihui cocolisti ipan ichaj, yon ma amo polihuica cati metzcuachotzitzí, yon cati cuahuactoque, yon cati miquij ica mayanti, yon cati miquij ipan tatehuilisti.”

30 Huajca quej nopa Joab huan iicni Abisai quimictijque Abner, pampa Abner achtohuiya quimictijtoya iniicni, Asael, ipan ne tatehuilisti cati oncac ipan altepet Gabaón.

31 Huajca David quiilhui Joab huan nochi cati itztoyaj ihuaya: “Xijtzayanaca amoyoyo, huan ximoyoyontica ica cati fiero huan xijchoquilica Abner.” Huan David yahuiyaya iniica cati quihuicayaya itacayo Abner para quitalpachotij. **32** Huan quitalpachojque Abner ipan altepet Hebrón. Huan David chicahuac chocac nopona campa quitalpachohuayayaj huan nochi cati itztoyaj ihuaya nojquiya chocaque. **33** Huan David quihuicati Abner ica ni huicat cati tahuel tetequipacho, quiijtohuayaya quej ni:

“¿Para ten timijqui quej ni, Abner?

Amo quinamiqui.

Timijqui quej se tachtejquet.

34 Momax amo cana ilpitoya,
yon moicxi amo ilpitoya ica tepos ca-dena.

Pero timijqui quej miqui se cati huetzi inimaco fiero tacame."

Huan nochí cati itztoyaj nōpona sempa chocaque.

35 Huan David amo tacuajqui ipan nōpa tonali. Huan hualajque tacame huan quiilhuique para ma tacua, pero amo qui-nejqui. Quinilhui:

—Ma techtatzacuilti Toteco sinta nijcuas se pantzi o se tenijqui hasta ixpoli-huis tonati.

36 Huan nochí nōpa israelitame campa hueli quimatque quenicatza David tahuel quichoquili Abner, huan quinpacti. Melahuac nochí cati David quichihuayaya te-pactiyaya. **37** Huan quej nōpa quimachilijque nochí israelitame ipan nochí altepeme ipan tali Judá huan ipan tali Israel para David amo tanahuatijtoya ma quimictica Abner.

38 Huan David quinilhui isoldados:

—Nelía ama mictoc se tohueyi taya-canca tiisraelitame. **39** Huan masque TO-TECO techtequitali nitanahuatijquet, amo nijpiya chicahualisti para nijtatzacuiltis Joab huan Abisai, cati iconehua Sarvia pa-ra niquincuepilis ni tajtacoli cati quichij-toque. Injuanti tahuel yoltetique huan tejtetique. Toteco iseli ma quintaxtahui por ni tajtacoli cati quichijtoque pampa quimictijque Abner.

Quimictijque Tanahuatijquet Is Boset

4 Huan quema quimatqui Tanahuatij-
quet Is Boset cati eliyaya icone Saúl para Abner mictoya ipan altepet Hebrón, tahuel momajmati huan nochí ipan tali Is-rael nojquiya moyolmajmatijque. **2** Huan itztoyaj ome tacame ipan itanahuatilis Is Boset cati quipiyayaya inintequi para quinyacanase soldados huan yase ipan se-quinoc talme para tachtequitij. Se itoca eliyaya Baana huan seyoc Recab, huan ini-juanti iconehua Rimón ten altepet Beerot huan eliyaya se iixhui Benjamín ten huej-cajquiya, **3** pampa nōpa masehualme ten altepet Beerot nojquiya eliyayaj iixhuihua Benjamín masque cholojtejque para itzto-tij ipan altepet Gitaim huan mocajque nōpona quej san paxalohuani hasta ama.

4 (Jonatán, icone Saúl, quipixtoya se icone cati metzcuauchotiyaya cati itoca Mefi Boset. Metzcuauchotixqui ipan nōpa tonali quema ajsic camanali ten altepet Jezreel para mijqui Jonatán cati eliyaya itata nōpa oquichpil huan Saúl cati eliya-ya ihueyi tata. Ipan nōpa tonali nōpa oquichpil san quipiyayaya macuili xihuit, huan se sihuat cati quimocuitahuiyaya quicuitejqui nōpa conet para cholojque. Huan pampa motalohuayaya huan moisi-huiltyaya para cholose, nōpa conet hue-tzito huan mocajqui metzcuauchotic.)

5 Huan nōpa tayakanani Recab huan Baana yajque ichaj Tanahuatijquet Is Boset quema tajcottona huan chicahuac tonayaya, huan yaya mosiyaquetztoya ipan icuarto. **6** Mochijque quej quinequiyayaj quiqxistise trigo para quitequihuise, huan amo aqui quinitac. **7** Pero Baana huan Recab xitahuac calajque ipan icuarto nōpa Tanahuatijquet Is Boset campa cochtoya huan quicalaquiliijque se cuataminti iijtico huan quimictijque. Huan teipa quiquech-tzontejque huan cholojtejque huan qui-huicaque itzonteco. Huan nejenque se-yohual para quiixcotonase nōpa tamaya-mit huan ajsitoj altepet Hebrón campa itz-toya David. **8** Huan quema ajsitoj, quinex-tilijque David Is Boset itzonteco huan qui-ilhuijque:

—Xitachili nica timitzhualiquilijtoque itzonteco Tanahuatijquet Is Boset, icone Saúl, cati mitzcualancaitayaya huan qui-nequiyaya mitzmictis. Huan ama TOTECO quichijtoc ximomacuepa ica Saúl huan nochí iixhuihua.

9 Huan David quinnanquili Recab huan iicni Baana huan quinilhui:

—Ixpa TOTECO cati techmanahuijtoc ten nochí notequipachol, nimechilhuis ca-ti melahuac. **10** Quema se techilhuico para Saúl mictoya huan moilhuiyaya se cuali camanali techhualiquilijtoc, niquitzqui huan nitanahuati ma quimictica nōpona ipan altepet Siclag huan quej nōpa nijtax-tahui por nōpa camanali cati techmacac. **11** ¿Huajca ama amo anquiitaj achi más monequi nimechchihuilis anfiero tacame pampa anquimictijque ni cuali tacat ipan

ichaj campa cochtoya? Quena, nimechtaxtahuis por cati anquichijtoque ica Is Boset huan nimechpolihuiltis ipan ni taltipacti.

12 Huan David quinnahuati isoldados ma quinmictica, huan quinmictique. Huan quintzontequilijque inimax huan iniicxi. Huan inintacayo quicuapilojque nechca nopa mantoc at ipan altepet Hebrón. Huan quitalpachoijque itzonteco Tanahuatijquet Is Boset ipan Hebrón ipan nopa ostot campa quitalpachojtoyaj Abner.

**David quichijque tanahuatijquet
ten nochí israelitame**

(1 Cr. 11:1-3)

5 Teipa ajiscoj nopa huehue tacame cati tayacanayayaj ipan nochí huejhuey familias cati itztoyaj ipan tali Israel huan quiitacoj David ipan altepet Hebrón. Huan quilhuicoj: “Tojuanti tiicnime huan san se toeso. **2** Masque achtohuiya Saúl eliyaya totanahuatijca, melahuac ta tieliyya tiitamocuitahuijca huan elqui ta cati nelía techyacanayaya para titatehuise. Huan ama TOTECO mitzilhuijtoc para ta teliis totamocuitahuijca huan totanahuatijca tiisraelitame.”

3 Huajca nropa David quichijqui se camanal sencahualli iixpa TOTECO ica nochí nropa huehue tacame ten tali Israel. Huan inijuanti quialtijque David ica aceite huan quitequitalijque para elis tanahuatijquet ten nochí israelitame. **4** Huan David quipiyayaya 30 xihuit quema pejqui tanahuatí huan tanahuati 40 xihuit. **5** Achtuhui para chicome xihuit huan tajco mosehui ipan altepet Hebrón huan quinnahuati san nropa israelitame ipan tali Judá. Huan teipa mosehui ipan altepet Jerusalén para 33 xihuit huan quinnahuati nochí israelitame ipan tali Judá huan ipan tali Israel.

**Jerusalén mochijqui
nopa altepet cati tayacana**

(1 Cr. 11:4-9)

6 Huan quema nopa tayacanani quialtijque David para elis inintanahuatijca, David huan nochí isoldados yajque altepet Jerusalén para quinquitxitij nropa jebuseos

cati itztoyaj nropa. Pero inijuanti quihuiuitaque huan quitaijilhuijque David: “Ta amo quema huelis ticalaquis nica. Hasta cati popoyotzitz huan cati metzcuauchotique mitztzacuilisquíaj para amo huelis ticalaquis.”

Quej nopa quijtojque pampa moilhuijque para David amo huelis calaquís.

7 Pero David huan isoldados tatanque huan moaxcatijque campa nelpano tilahuac huan temachti nopa tepamit ipan tepepet Sion, huan ama nochí quitocaxtíaj nropa colonia ipan Jerusalén ica Ialtepe David. **8** Huan quej ni David quitanqui nopa altepet. Nopa tonali quema David quicajqui quitaijilhuíaj, quinilhui isoldados: “Nochi cati anquinequij anquintehuise nropa jebuseos, xicalaquaica ipan nopa hueyi tubo campa calaqui at ipan inialtepe. Huan quej nopa anajsitij campa itztoque huan anquinmictise nopa sentan tacame cati quinequij techtanise tojuanti cati inijuanti tehtocaxtíaj ‘tipopoyotzitz huan timetzcuachotique’. Tahuel niquinualancaita.” Ica ni pejqui nropa camanal cati ama quijtohuaj campa hueli: “Cati popoyotzitz huan cati metzcuauchotique amo hueli calaquine ipan ichaj Toteco, pampa quej nopa quintocaxtiyayaj nochí nropa masehualme cati quinhueyichihuayayaj taixcopincayome quej quichihuayayaj nropa jebuseos.”

9 Huan David mochantali ipan nropa colonia ipan Jerusalén nechca campa quipixtoya itepa nelpano tilahuac huan temachti huan quitocaxtalijtoya Ialtepe David. Huan quiquetzqui seyoc tepamit yahualtic ichaj huan ichaj pejqui nropa ipan nropa altepet cati itoca Milo huan yajqui hasta más calijtic ten nropa altepet.

Hiram quintitanqui tacame campa David

(1 Cr. 14:1-2)

10 Huan David más mohueyichijtiyahuiyaya pampa TOTECO Dios Catí Quinyacana Iilhuicac Ejcahua Ma Tatanitij itztoya ihuaya. **11** Huan Tanahuatijquet Hiram cati quinahuatiyaya altepet Tiro quititanili David huejhueyij tacame para ma quipaxalotij David. Huan inihuaya quititanqui

miyac tiocuahuit, huan cuaximani huan calchihuani cati quimatiyaj quitejtequij tet para quichihuilise David se hueyi cali. 12 Huan David quimachili para elqui TOTECO cati quitequitalijtoya para elis inintanahuatijca israelitame. Huan quimachili para yaya TOTECO cati tahuel quihueytalijtoya itanahuatilis huan quichijqui pampa TOTECO tahuel quinicnelia nopa israelitame huan quintapejpenijtoya para iaxcagua.

Sequinoc iconehua David

(1 Cr. 3:5-9; 14:3-7)

13 Huan quema David ya quiijcuenijtoya ichaj ten altepet Hebrón hasta Jerusalén, mocuili más isihuajhua huan iompa sihuajhua, huan tacatque más iconehua; oquichpilme huan sihuapilme. 14 Ya ni iconehua David cati tacatque ipan altepet Jerusalén: Samúa, Sobab, Natán, Salomón, 15 Ibhar, Elisúa, Nefeg, Jafía, 16 Eli-sama, Eliada huan Elifelet.

David quintanqui nopa filisteos

(1 Cr. 14:8-17)

17 Huan quema nopa filisteos quicajque para nopa israelitame ipan tali Israel nojquiya quialtijtoyaj David para elis inintanahuatijca, yajque ica nochis inisoldados para quiitzquise. Huan David quicajqui para hualayayaj nopa filisteos, huajca yajqui motatito ipan altepet Jerusalén ipan nopa cuarto campa más tilahuac itepa huan cuali tzactoc. 18 Huan nopa filisteos hualajque huan moxejxelojque ipan nochis nopa tamayamit cati itoca Refaim nechca Jerusalén. 19 Huajca David motatajti ica TOTECO huan quilhui:

—¿Tijnequi ma niya niquintehuiti ni filisteos? ¿Techmactilis nomaco para niquintanis?

Huan TOTECO quiilhui:

—Quena, xiquintehuiti huan temachti na nimitzmactilis nochis momaco.

20 Huajca David quisqui huan quintehui nopa filisteos huan quintanqui. Teipa quitocaxtali nopa lugar Baal Perazim cati quinequi quiijtos “ojta pojtoc” pampa quiijto: “TOTECO chicahuac ajositoc ica nocua-

lancaitacahua quej chicahuac quisa at campa quitapohua se aojti.” 21 Huan nopa filisteos cholojque huan quicajtejque ininteteyohua huan David ica isoldados quin-tatijque.

22 Huan teipa nopa filisteos sempa ta-cuepilijque huan mochihuacoj campa itz-toyaj achtohuiya ipan nopa tamayamit Refaim. 23 Huan sempa David quitatzinto-quili TOTECO taya ipaquilis. Huan TOTECO quiilhui:

—Quena, pero amo xiya xiquinnami-quiti campa iniixmelac. Achtohui xiquin-yahualoca ixtacatzí huan xiquintehuiti campa nopa cuame balsameras. 24 Huan quema anquicaquise tahuejchihualisti quej soldados cati tacacapatzasquíaj huej-capas ipan ixihuiyo nopa balsameras, huajca nimantzi xiquintetzopaca, pampa nopa caquisti quinequi quiijtos para na nquistoc para nimechyacanas anquintanise nopa filisteos.

25 Huajca David quichijqui senquisa quej TOTECO quinahuatijtoya huan yaya inihuaya isoldados pejque quinmictíaj nopa filisteos ten altepet Gabaón huan ajsitio hasta altepet Geser.

David quinejqui quihualicas icaxa TOTECO ipan Jerusalén

(1 Cr. 13:5-14)

6 David sempa quinsentili cati más ta-pejpenilme ten nochis israelita soldados huan mochijque 30 mil soldados. 2 Huan nochis inijuanti quistejque ihuaya David para yase ipan altepet Baala ipan tali Judá. Yajque para quihualicase icaxa Toteco Dios. Nopa caxa cati quihiuca itoca TOTECO Cati Quinyacana Iilhuicac Ejca-hua Ma Tatanitij huan cati eltoc itzonco nopa ome querubines cati eltoque itzonco nopa caxa. 3-4 Huan quiqixtijque icaxa Toteco Dios cati eltoya ipan se tetep ipan ichaj Abinadab huan quitalijque ipan se cuacarre yancuic. Huan Uza huan Ahío iconehua Abinadab quihiucaeque nopa cuacarre cati quihiuicayaya icaxa Toteco Dios. Huan Ahío tayacantiyahuiyaya. 5 Huan David huan nochis nopa israelitame quitoquilijtiyahuiyaj. Huan mijtotijtiya-

huiayaj ica miyac paquilisti. Huan huicatiyahuiyaj iixpa TOTECO ica nochitamanti tatzotzonali quej arpas, salterios, panderos, flautas huan címbalos.

6 Quema ajsitoj campa itrigo mil Nacón, nopa huacaxme cati quihuicayayaj nopa cuacarro motepotanijque, huan Uza momatananqui para quitzacuilis icaxa Toteco Dios para amo huetzis. **7** Huan TOTECO tahuel cualanqui ica Uza pampa amo quiimacasqui quitzquis icaxa huan quimieti nopona nechca nopa caxa.

8 Huan David tahuel mocueso por cati quichijtoya TOTECO ica Uza huan quitocaxti nopa lugar Pérez Uza. (Pérez Uza quiijtosnequi Campa Toteco Cualanqui Ica Uza.) Huan hasta ama quej nopa itoca. **9** Huan David quiimacasqui TOTECO ipan nopa tonali huan quiijto: “¿Quenicatza huelis nihuicas icaxa TOTECO campa niitztoc?” **10** Huajca ayecmo quinejqui quihuicas icaxa TOTECO ipan Jerusalén campa itoca Ialtepe David, huan tanahuati ma quihuicaca ichaj Obed Edom cati achtohui ejquet ipan altepet Gat, pero ama quipixtoya ichaj nechca campa eltoya nopa caxa. **11** Huan nopona mocajqui icaxa TOTECO eyi metzti, huan TOTECO miyac quitiochijqui Obed Edom huan nochitachaj ehuaní.

**David quihuicac icaxa TOTECO
ipan Jerusalén**

(1 Cr. 15:1 — 16:6)

12 Teipa quema David quimatqui para TOTECO miyac quitiochijtoya Obed Edom pampa quipixqui icaxa, yajqui nopona, huan ica miyac paquilisti quiqxiti icaxa Toteco Dios huan quihuicac ipan nopa colonia cati itoca Ialtepe David. **13** Huan quema nopa tacame cati quihuicayayaj icaxa Toteco Dios quimajc妖toyaj iniicxi chicuase huelta, moquetzque huan mochixque huan David quitenajqui se toro huan se becerro cati tomahuac quej tacajcahualisti para Toteco Dios.

14 Huan David mijtotiyaya ica nochitachicahualis iixpa TOTECO huan moyoyontijtoya quej moyoyontíaj totajtzitzi. **15** Huan quej nopa David huan nochitachaelitame quihuicatiyajque icaxa TO-

TECO ica miyac paquilisti. Huan inihuaya yajque cati tapitztiyajque.

16 Huan quema icaxa TOTECO quiaxititihuialayaj ipan Ialtepe David, Mical, isihua David cati eliyaya icona Saúl tachiayaya ipan ventana, huan quiitac para Tanahuatijquet David huitontihuialayaya huan mijtotijtihuialayaya huan tahuel quiqualancaitac ipan iyolo.

17 Huan quicalaquijque icaxa TOTECO ipan se yoyon cali cati David quicualtalijoya para ya nopa. Huan David quimacac tacajcahualisti TOTECO cati tatatili huan tacajcahualisti para ma onca tayoltalili ihuaya TOTECO. **18** Quema tanqui quitenahua nopa tacajcahualisti, David quintiochijqui nochitachaelitame ipan itoca TOTECO, Yaya Cati Quinyacana Iilhuicac Ejchahua Ma Tatanitj. **19** Huan quinmajmacac nochitacame huan sihuame sesen pantzi huan se tatecti nacat huan se torta ten xocomecat huactoc. Teipa quema tanqui nochitachaelitame ipan itoca TOTECO, Yaya Cati Quinyacana Iilhuicac Ejchahua Ma Tatanitj. **20** Huan quinmajmacac nochitacame huan sihuame sesen pantzi huan se tatecti nacat huan se torta ten xocomecat huactoc. Teipa quema tanqui nochitachaelitame ipan itoca TOTECO, Yaya Cati Quinyacana Iilhuicac Ejchahua Ma Tatanitj. **21** Huan quinamiquico ihuehue huan quihiuitac, huan quiilhui:

—Fiero tinesiyaya ama, ta cati tiTanahuatijquet ipan Israel. Timonextijtoc iniixpa moichpoca tequipanojcahua quej ten hueli tacat, pampa timoquixtili motaque cati huehueyac ten tanahuatijquet.

21 Huan David quinanquili:

—Nochi nijchijtoc ica nochitachaelitame ipan itoca TOTECO pampa yaya techtapejpenijtoc para nielis niTanahuatijquet ten imasehualhua ipataca motata huan ifamilia, huajca yeca nimijtotijtoc iixpa. **22** Huan sinta ninesi noja más nihuahuitic moixpa pampa nimoicnnonequi iixpa ya, amo teno para na. Sequinoc techhueyitepanitase pampa nimoicnnonequi iixpa TOTECO hasta nojquiya techhueyitepanitase nopa ichpoca tequipanohuani cati inihuaya ticamanalti.

23 Huan TOTECO quichijqui Mical, iichpoca Saúl, ma amo quema coneipyá hasta mijqui.

**David quinequi quichihuas
itiopa Toteco Dios
(1 Cr. 17:1-27)**

7 Huajca teipa David mosehui ipan no-pa caltanahuatili huan ayecmo quisayaya para tatehuis pampa TOTECO quimacac tasehuilisti ica noch iqualancaitacahua. **2**Huan David quilhui nopa tajtolpanextijquet Natán:

—Na nimopantía ipan se cali yejyectzi huan icaxa Toteco Dios eltoc ipan se yoyon cali.

3Huan Natán quinanquili:

—Xijchihua noch iqua tiquita cuali pa-ra tijchihuas, pampa TOTECO itztoc mo-huaya.

4Huan ipan nopa tayohua TOTECO qui-nojnotzqui Natán huan quiilhui:

5“Xiya xiquilhuiti notequipanojca David para yaya amo quichihuas se cali campa niitztos. **6**Amo quema nimopantijtoc ipan se caltiopamit hasta nopa tonali quema niquinquixti amohuejapan tatahua ipan tali Egipto huan hasta ama. Nochipa nimopantijtoc ipan se yoyon cali. **7**Ninejenqui inihuaya israelitame campa hueli pero amo que-ma nijtajtanijtoc se tayacanquet cati nijtalijtoc para quinmocuitahuis nom-a-sehualhua para ma techchihuli se tio-pamit ten tiocuahuit.

8“Xiquilhui David para na niiTECO Cati Niquinyacana Noilhuicac Ejeahua Ma Tatanitij huan niquilhuía ya ni: ‘Na nimitzapejpeni para tielis tanahuatij-quet ipan noisraelita masehualhua quema tieliyaya se tamocuitahuijquet ten borregonjme. **9**Na nimocajtoc mu-huaya campa hueli campa tinemiyaya, huan mocualancaitacahua na niquintzontamiltijtoc. Nimitzchihuas noja más tihueyi hasta tielis hueyi quej no-pa tacame cati más motepanitaj ipan ni taltipacti. **10**Huan nojquiya niquinta-pejpenilijtoc se tali campa niquinalis noisraelita masehualhua. Huan npona itztose ipan se tali cati iniaxca huan ayecmo aqui quincualancamacas. Huan cati fierojtique ayecmo quintaij-yohuiltise quej quichihuayaj achto-

huiya **11**ipan nopa tonali quema ni-quintali jueces ma quinyclanaca noisraelita masehualhua. Huan nijchihuas para tiitztos ica cuali ica mocualanca-itacahua.

“Pero na cati nimoTECO nimitzil-huía para amo ta cati techchihuilis no-chaj, elis na cati nimitzchihuilis ta, Da-vid, se cali ten tanahuatiani huan se ta-nahuatilisti cati mocahuas para mote-ipan ixhuihua. **12**Huan quema timquis huan timosiyajquetas ica motatahua, na nijtalis se mocone cati quisas ten moxinacho para tanahuatis huan itana-huatis nijchihuas temachti. **13**Huan yaya cati mocone, quena, techchihuilis se tiopamit huan nijchihuas temachti itanahuatil para nochipa. **14**Huan na nielis quej itata huan yaya elis quej no-cone. Huan sintia yaya techixpanos, na nijtatzacultis quej se tetaj quichihua ica icon. Quena, niquintequihuis tacame ten sequinoc talme para ma quita-zacultica por na. **15**Pero nochipa nij-piyas hueyi noyolo ica ya. Amo quema nijtahuelcahuas quej nijtahuelcajqui Saúl cati achtohui elqui tanahuatijquet huan niquixti para nimitzalnis ta titana-huatis. **16**Huan na niquinalis mote-ipan ixhuihua para quipiyase tanahuati-tili para nochipa noixpa. Quena, mote-quiticayo ten tanahuatijquet nimitzma-catoc para nochipa huan nochipa se moteipan ixhui tanahuatis.”

17Quej nopa TOTECO quilhui Natán ipan se tanextili para ma quilhui David. Huan Natán yajqui huan quilhuito David noch iqua TOTECO quilhuijtoya.

**David quihueyitali huan quitascamatqui
TOTECO**

18Huan Tanahuatijquet David yajqui campa nopa Yoyon Tiopamit huan motali iixpa TOTECO huan quijijo:

“TOTECO, ta cati tijpiya noch i tanahuatili, na amo teno nopal. Yon nofa-milia amo hueyi para techhueyichijtoc quej tijchijtoc. **19**Huan amo san ya no-pa cati tijchijtoc, pero nojquiya tiqui-jtojtoc para noteipan ixhuihua tanahu-

tise para nochipa. TOTECO, amo aqui seyoc cati quipiya hueyi iyolo quej ta tijpiya ica na.

20 "Huan ¿taya más huelis nimitzilhuis para nimitztascamatis? TOTECO, ta cati tijpiya nochि tanahuatili, ta cuali techixmati. 21 Ica mopaquilis tijchihua nochि ni huejhueyi tamanti quej tiquijtojtoc tijchihuas, huan nochि tijchijtoc pampa hueyi moyolo. Huan techilhui para ma nijmati na taya tijchihuas teipa.

22 "TOTECO, ta cati tijpiya nochि tanahuatili, tahuel tihueyi. Amo quema tijcactoque ten seyoc quej ta. Amo aqui seyoc Dios; ta tiyojtz. 23 Huan amo onca seyoc tali imasehualhua cati quiselijoque tatiochihuali quej ta techtiochijtoc tiisraelitame cati techchijtoc tímomasehualhua. Ta, Toteco Dios, cati techquixti ipan tali Egipto huan tiquinquixti toixpa sequinoc tali ehuani ica ininteteyohua, pampa techicnelía. Techchihuili huejhueyi tanextili nepa iniixpa nopa Egipto ehuani. Huan nochि tijchijqui para ma mohueytitali motoca ta. 24 Pampa, TOTECO, ta tiquijtojtoc para techtapejpenijtoc tiisraelitame para ma tielica timomasehualhua para nochipa huan ta timochijtoc to-Dios tojuanti.

25 "Huanca TOTECO Dios, temachti xijchihua cati tiquijtojtoc techchihuilis. Xijchihua para notanahuatil huejcahuas huan para se noteipan ixhui nochipa tanahuatis moixpa quej tiquijtojtoc. 26 Nochi masehualme ma mitzhueyichihuaca para nochipa. Huan ma nochि quijjtoca: 'TOTECO, Ta Cati Tiquinacana Nochi Moilhuicac Ejcahua Ma Tatanitij, ta cati toDios tiisraelitame.' Huan para nochipa temachti xijcahuili se noteipan ixhui ma mosehui quej notanahuatijca moixpa.

27 "Pampa ta, TOTECO, Cati Tiquinacana Moilhuicac Ejcahua Ma Tatani-tij, tijpiya nochि chicahualisti huan ta titoteco nochि tiisraelitame. Techilhuijtoc para tijchihuas temachti notanahuatilis huan yeca na, nimotequipa-

nojca, nimotatajtijtoc quej ni para nij-selis cati techilhuijtoc. 28 Ta titOTECO Dios, ta cati nelnelia tiDios. Huajca melahuac nopa cati cuali cati tiquijtouha techchihuili. Ta tiquijtojtoc para techchihuili se nochaj ten tanahuatiani cati huejcahuas ica se noteipan ixhui cati tanahuatis para nochipa. 29 Huajca xijchihua cati tiquijtojtoc. Huan ama techtiochihua huan xiquintiochihua nocone-hua huan noteipan ixhuihua para nochipa, pampa quej nopa, ta TOTECO Dios, noca timocajtoc para tijchihuas. Huan pampa techtiochijtoc, no-tanahuatilis huan noteipan ixhuihua cati tanahuatise elise tatiochihualme para nochipa."

David tatanqui campa hueli

(1 Cr. 18:1-13)

8 Huan teipa David quintanqui nopa filisteo masehualme huan quinicnotali. Moaxcati nopa altepet Gat cati eliyaya ini-altepe cati más hueyi.

2 Nojquiya quintanqui moabita tacame huan quinchijqui para ma motecaca talchi nejnechca se inacasta seyoc. Huan quintamachijque ica ihuehueyaca se lazo. Huan teipa quintamachijtiyajque sempa ica nopa lazo, huan nopa tacame cati inintacayohua mocajque ipan nopa ompa lazo ihuehueyaca quinmictijque. Huan tacame cati inintacayohua mocajque ipan nopa expa lazo, quincahuilijque ma itztoca. Huan nopa moabitame cati mocajque yol-toque elque itequipanojcahua David huan quitaxtahuijque impuestos.

3 Huan nojquiya David quitanqui Tana-huatijquet Hadad Ezer cati elqui tanahuatijquet ipan altepet Soba huan eliyaya ico-ne Rehob. Quitanqui quema yahuiyaya para sempa moaxcatis nochि nopa tali nechca hueyat Eufrates. 4 Huan ipan nopa tonali David quinitzqui mil 700 isoldados cati yahuiyayaj cahuayo-jtipa huan 20 mil cati icxinejnemiyayaj huan quinhuicac il-pitoque. Huan nojquiya quincocohuili-jque sese iniicxi nochि nopa cahuayo-jme cati quihuicayayaj nopa tatehuijca carroj-me. San quincajqui cuali nopa cahuayo-j-

me cati monejqui para quitilanase san 100 tatehuijca carrojme.

⁵Huan quema hualajque nopa sirios ten altepet Damasco para quipalehuis-quíaj Hadad Ezer, nopa tanahuatijquet ten altepet Soba, David nojquiya quinmicti 22 mil ten injuanti. ⁶Huan David quintali miyac soldados para tamocuitahuisse ipan nopa sirios ipan altepet Damasco. Huan nopa sirios elque itequipanojcahua David huan sesen xihuit quitaxtahuiyayaj imuestos. Huan TOTECO quipalehui David campa hueli campa ya yahuiyaya.

⁷Huan David quincuili nojquiya iniyol-ixtzajcahua cati itayacanca soldados Hadad Ezer quihiucayaya iniixpa huan nochí eliyaya oro. Huan David nochí quihiucac ipan altepet Jerusalén. ⁸Huan nojquiya Tanahuatijquet David quicuic tahuel miyac tamanti ten bronce ipan altepeme Beta huan Berotai cati quinahuatiyaya Hadad Ezer.

⁹Quema Tanahuatijquet Toi ipan altepet Hamat quimatqui para David quintanqui nochí isoldados Hadad Ezer, ¹⁰quititanqui itelpoca cati itoca Joram para quipaxalos ica cuali huan quihueytalis David pampa quitantoya Hadad Ezer cati eliyaya nojquiya icalancaitaca. Huan Joram quihiuquila David miyac tamanti ten oro, plata huan bronce.

¹¹Huan Tanahuatijquet David quiiyocatali nochí ni tamantzitzí para TOTECO quej nojquiya quiyyocatalijtoya para TOTECO nochí oro huan plata cati tequixtilijtihualajtoya ipan campa hueli altepeme cati quitantihuallajtoya. ¹²Quinquixtilijtoya miyac tamantzitzí nopa sirios, moabitame, amonitame, filisteos, huan amalecitame. Huan nochí quimacac Toteco quej nojquiya quiyyocatali para ya nochí cati quicuilijtoya Hadad Ezer, nopa tanahuatijquet ten Soba.

¹³Huan quej nopa David mochijqui hueyi campa hueli. Huan quema tacuepili ten nopa tatehuijlisti, David quinmicti 18 mil edomitame ipan nopa Tamayamit ten Istat.

¹⁴Huan David quintali miyac soldados para tamocuitahuisse ipan tali Edom. Huan nochí nopa Edom ehuani mochijque ite-

quipanojcahua David, pampa TOTECO quipalehuiyaya David campa hueli yahuiyaya para ma tatani.

Itayacancahua David

(2 S. 20:23-26; 1 Cr. 18:14-17)

¹⁵Huan David tanahuati ipan Israel huan quichijqui cati xitahuac huan cati cuali ica nochí imasehualhua. ¹⁶Huan Jobab, icone Sarvia, eliyaya nopa tayacanquet ten isoldados David. Huan Josafat, icone Ahilud, cati quiijcuilojtiyajqui cati panoc mojmosta ipan itanahuatilis David. ¹⁷Huan Sadoc, icone Ahitob, huan Ahimelec, icone Abiatar, eliyaya totajtzitzí. Huan Seraías eliyaya itajcuilojca David. ¹⁸Huan Benaía, icone Joiada, quinnahuatilyaya nopa soldados cati quimocuitahuiyayaj David huan cati motalohuayayaj para quihiucase se camanalí quema quititaniyaya para sejcoyoc. Huan iyoca ten Benaía, David quinpixqui itelpocahua quej itapalehuijcahua cati más huejhueyi.

David huan Mefi Boset

⁹Se tonali David tatzintocac: “*¿Amo mocajtoc itztoc yon se ichaj ehuani Saúl para huelis nijpalehuis por iteicneil mijcatzi Jonatán cati tahuel niquicneliyaya?*”

²Huan quipanti se tacat cati tatequipanojtoya ipan ichaj Saúl cati itoca eliyaya Siba. Huajca quinotzque para yas iixpa Tanahuatijquet David. Huan quema ajsito David quiilhui:

—*¿Ta tiSiba?*

Huan quinanquili:

—*Quena.*

³Huajca David quiilhui:

—*¿Amo mocajtoc yoltoc se acajya ten ifamilia Saúl cati huelis nijnextilis itaicnelicayo Toteco Dios?*

Huan Siba quinanquili:

—*Mocajtoc se icone Jonatán cati amo hueli nejnemi pampa metzcuaachotic ipan nochí ome iicxi.*

⁴Huan David quitatzintoquili Siba canque itztoc. Huan Siba quiilhui para itztoya ipan altepet Lodebar ipan ichaj Maquir, icone Amiel. ⁵⁻⁶Huajca David nimantzi ta-

nahuati ma quihualicaca Mefi Boset icona mijecatzi Jonatán huan iixhui mijecatzi Saúl. Huan quema Mefi Boset ajisco iixpa David, motancuaquetzqui ica miyac tatepanitacayot.

7 Huan David quiilhui:

—Amo ximajmahui. Na nelía nijnequi nimitzpalehuis huan nimitzchihuilis cati cuali pampa tahuel niquicneli motata Jonatán. Na nimitzcuepilis nochí nopa tali cati eliyaya iaxca mohueyi tata Saúl huan ta tiitztos nica ipan nochaj huan nochipa titacuas nohuaya.

8 Huan Mefi Boset mohujtzonqui talchi ica tatepanitacayot. Huan teipa quiilhui David:

—Na amo niteno para tahuel techtasojtas. Niitzaquej se chichi cati mictoc.

9 Huan teipa David quinotzqui Siba ite quipanojca Saúl huan quiilhui:

—Nochí cati eliyaya iaxca moteco Saúl huan nochí ichaj ehuani ama nijmactilijtoc Mefi Boset cati iixhui Saúl. **10** Huan ta, mocoñehua huan motequipanojcahua antequitise ipan nochí ital para oncas cati monequi para ichaj ehuani, pero Mefi Boset tacuas mojmosta ipan nomesa nohuaya.

Huan Siba quinpixtoya 15 iconehua huan 20 itequipanojcahua. **11** Huan Siba quiilhui Tanahuatijquet David:

—Nimotequipanojca nijchihuas nochí cati techilhuijtoc ma nijchihua.

Huajca Mefi Boset itztoya ipan ichaj Tanahuatijquet David huan tacuajqui ihuaya quej elisquía se icona. **12** Huan Mefi Boset quipixtoya se ioquichpil cati itoca eliyaya Micaíta. Huan nochí ichaj ehuani Siba quitequipanohuayayaj Mefi Boset. **13** Pero Mefi Boset cati metzcuauchotic ipan nochí ome iicxi mocajqui para itztos noppa ipan altepet Jerusalén huan nochipa tacuayaya ihuaya Tanahuatijquet David.

Tatehuiilsti ica nopa sirios

huan amonitame

(1 Cr. 19:1-19)

10 Huan quema ya panotoya tonali, mijqui inintanahuatijca nopa amonitame huan Hanún icona mocajqui tanahuatijquet ipan itanahuatilis. **2** Huan Da-

vid quiijito: “Na nijchihuas cati cuali ica Hanún, icona Nahas, quej itata quichijqui cati cuali ica na”. Huan David quintitanqui tacame para ma quiyoltalitj pampa mijqui itata. Huan quema ajisitoj ipan inintal amonitame, **3** nopa tayacanani cati quipalehuiyajay Tanahuatijquet Hanún quiilhuijque: “¿Para ten timoilhuá David quintitantoc ni tacame para mitzyoltalise pampa mijqui motata? Amo ya nopa. Quintitantoc para ma quiixmatiquij cuali total huan teipa techtehuiquij huan techtanise.”

4 Huajca Hanún quinitzqui itatitanilhua David huan quintequili san se lado inintentzo cati huehueyac para quinpina haultis. Huan nojquiya quintequilijque iniyoyo huehueyac hasta inintzinpa, huan quinmajcrajque para ma tacuepilica.

5 Huan quema quimatqui David cati quinchihuilijtoyaj itatitanilhua, quintitanqui tacame para ma quinnamiquitij. Huan quinilhuitoj ma mocahuaca ipan altepet Jericó hasta quema moscaltis huehueyac inintentzo huan huajca hualase, pampa tahuel tepinajti quej quinchijtoyaj.

6 Huan quema nopa amonitame quimachilijque para quicualancamacatoyaj David, quintaxtahuijque 20 mil tali Siria tacame cati icxinejnemiyayaj cati hualajque ten tali Bet Rehob huan altepet Soba. Huan quintaxtahuijque se mil tacame ma hualaca ica nopa tanahuatijquet ten Maaca huan 12 mil tacame ma hualaca ten Is Tob. **7** Huan quema David quimatqui cati quichihuayayaj, quititanqui icapitán, Joab ica nochí isoldados cati más tetique. **8** Huan nopa amonitame motalijque para quimocuitahuise nopa caltemit ipan nopa tepamit cati quiyahualo inialtepe. Huan nochí nopa tali Siria tacame cati hualajque ten Soba, Is Tob huan Maaca mochique quentzi huejca ten nopa altepet ipan tamayamit.

9 Huan quema Joab quiitac para oncas quinpixtoya icualancaitacahua, quiniyocatali nopa israelita soldados cati más tapejpenilme para yase ihuaya ya huan quintehuise nopa sirios. **10** Huan nopa se quinoc soldados quincajtejqui ihuaya iic-

ni, Abisai, para ma quintetzopaca nopa amonitame. ¹¹Huan Joab quiilhui iicni, Abisai: "Sinta tiquita para nopa sirios techtanisnequij, techpalehuipui. Huan sinta na niqutas para nopa amonitame mitztanisnequij, na nimitzpalehuis. ¹²Ximoyolchicahua huan ximosemaca para titatehuise chicahuac para tijmanahuise total huan toaltepehua tiimasehualhua Totecos Dios. Huan TOTECO ma quichihuas cati ipaquilis ipan ni tatehuilisti."

¹³Huajca Joab huan nochí isoldados monechcahuijque para quintehuise nopa sirios, huan nopa sirios cholotejque. ¹⁴Huan quema nopa amonitame quiitaque para nopa sirios cholohuayayaj, ini-juanti nojquiaj cholotejque iniixpa Abisai huan isoldados, huan sempa calajque para motatise ipan inialtepe. Huan Joab huan nochí isoldados tacuepilijque para ininchaj ipan altepet Jerusalén.

¹⁵Huajca nopa sirios quiitaque para amo yajatij para moixnamique inihuaya nopa israelitame. Huan sempa mocualtajque para tatehuise, ¹⁶huan hualajqui Hadad Ezer para quinpalehuis. Yaya eliyaya tanahuatijquet ipan altepet Soba. Huan Hadad Ezer tatitantoya para ma hualaca nopa sequinoc sirios cati itztoyaj ipan se-yoc nali hueyat Eufrates huan nochí ini-juanti ajsicoj ipan se lugar cati itoca Helam. Huan ni soldados quinyacanayaya Sobac cati eliyaya capitán ten isoldados Hadad Ezer. ¹⁷Huan quema David quiilhuijque cati nopa sirios quichihuayayaj, sempa quinsentili nochí israelita soldados huan quiixcotonque hueyat Jordán huan yajque Helam. Huan nopa sirios mocualtajque huan quitehuijque David ihuaya isoldados. ¹⁸Huan nopa sirios sempa cholotejque iixpa isoldados David. Huan David quinmicti 700 sirios cati yahuiyayaj ipan tatehuijca carrojme, huan 40 mil cati nemiyayaj cahuayoxtipa. Nojquiaj quico-co Sobac cati quinyacanayaya isoldados Hadad Ezer huan nopona mijqui. ¹⁹Huajca nochí nopa tanahuatiani quiitaque para amo yajatij ica tali Israel. Yeca motemaca que ica Israel huan quichijque se camanal sencahualli inihuaya para quintequipano-

se. Huajca nopa sirios ayecmo motemaca que para quinpalehuise nopa amonitame iixpa David pampa majmahuiyayaj.

Itajtacol David

1 1 Huan teipa quema pejqui yancuic xiuit, ipan nopa tonali quema nochí tanahuatiani momatiq quisaj para tatehuitij, David san quititanqui Joab huan nopa israelita soldados ma tatehuitij. Huan quiyahualotoj altepet Rabá huan pejque quintehuiaj nopa amonitame. Pero David mocajqui ipan Jerusalén.

²Huan se tiotac David mijquejqui campa mosiyajquetztoya huan pejqui paxalohua calcuitapa ten icaltanahuatil. Huan quiitac se sihuat cati maliyaya ipan seyoc calcuitapa. Huan David quiitac para tahuvel yejectzi eliyaya. ³Huajca tatzintocac taya itoca nopa sihuat, huan quiilhuijque para itoca Betsabé huan eliyaya icona Eliam huan isihua Urías, se heteo tacat. ⁴Huan David tatitanqui para ma quinotzaca nopa sihuat huan ma quihualiquilica. Huan Betsabé hualajqui huan David cochqui ihuaya. Huan teipa nopa sihuat mopajpajqui quej quiijtohuayaya itanahuatil-hua Moisés para monequi quichihuas se cati ya nopa quichijtoc huan tacuepili ichaj. ⁵Huan teipa quimatqui para quiconemacatoya David huan quititanili se amatajcuiloli para ma quimati David.

⁶Huan David quitajcuilhui Joab para ma quititanili Urías, nopa heteo tacat cati eliyaya ihuehue Betsabé, pampa Urías eliyaya se isoldado David. Huan Joab quititanqui Urías ma yahui ichaj David. ⁷Huan quema Urías ajsico ichaj David, David quittatzintoquili quenicatza itztoc Joab huan isoldados, huan taya oncatoc ipan ne tatehuilisti. ⁸Huan teipa David quiilhui:

—Xiya mochaj, huan ximalti huan ximosiyaqueta.

Huan quema ya quistoya, David quititanili se tacualisti cati cuali quej se nemacti. ⁹Pero Urías amo yajqui ichaj. Yaya san cochqui nechca caltemit ipan icaltanahuatil David campa cochij iteqipanojchua. ¹⁰Huan quiilhuijque David:

—Urías amo yajqui cochito ichaj.

Huajca David quinotzqui Urías huan quiilhui:

—¿Para ten amo ticochito mochaj? Pampa ya huejcajtoc para amo ticochtoc ipan mochaj.

11 Huan Urías quinanquili:

—Icaxa Toteco, huan noteco Joab, huan nochí israelita soldados ten tali Israel huan tali Judá, itztoque ipan cuatitamit ipan pilxajcaltzitzí. ¿Quenicatzá huelis niyas nochaj nitacuati, huan nitaiti huan nichis ihuaya nosihuá? ¡Amo! Amo quema njichihuas ya nopa.

12 Huajca quiilhui David:

—Cualtitoc. Ximocahua ama nica huan mosta nimitzcahuilis titacuepilis ipan tatehuistli.

Huajca Urías mocajqui nopena. 13 Huan David quinotzqui ma tacua huan ma tai ihuaya, huan David quiühuinti. Huan quema tayohuixqui, Urías quisqui huan cochito sempa campa itequipanojchua David, huan amo yajqui ichaj.

14 Huan tonili David quitajcuilhui Joab huan quititanili nopa tajcuiloli ica Urías. 15 Huan ipan nopa tajcuiloli quiilhuiyaya ya ni: “Xijtalica Urías ipan nopa achtohui tatilimit ten soldados iixmelac campa más mahuilili nopa tatehuistli. Huan teipa ximiquixtca huan xijcajtehuaca iseli para ma quicococa huan ma quimictica.”

16 Huajca quej nopa quichijqui Joab. Quema quiyahualojque nopa altepet para quitehuise, Joab quitali Urías campa qui-matiyaya itztoyaj nopa soldados cati más temachme ten inincualancaitacahua. 17 Huan teipa quisque inincualancaitacahua ipan nopa altepet huan quinmictijque miyac isoldados David, huan nojquiya mijqui Urías, nopa heteo tacat. 18 Huan Joab quititanqui se tacat ma quiilhuiti David nochí cati panotoya ipan nopa tatehuistli. 19 Huan Joab quiilhui itatitanil: “Huan quema titamis tijpohuilía David nochí cati panotoc, 20 sinta yaya cualanis huan mitzilhuis: ‘¿Para ten amnonechca-huijque ipan itepa nopa altepet? ¿Amo anquimatiyayaj para huelis tejcose tepanix-co huan quimajcahuase ten hueli teposti?’ 21 O sinta quijitos: ‘¿Amo anquielnamiquij

cati panoc ipan altepet Tebes quema se si-huat quimicti Abimelec, icoce Jerobaal, ica se metat cati quimajcahuili ten huejca-pa? Huajca ¿para ten amnonechcahuijque tahuel?’ Huajca sinta quej nopa mitzilhuis David, xiquilhui: ‘Nojquiya mijqui mote-quipanojca, Urías, nopa heteo tacat.’”

22 Huan nopa tatitanili quisqui iixpa Joab huan yajqui quiitato David. Huan quema ajsto, nochí quipohuili David quej Joab quiilhuijtoya. 23 Quiilhui:

—Tocualancaitacahua hualajque para techehuisquíaj cuatita, pero tiquintoquillique hasta campa calaquitoj ipan inialte-pe. 24 Huan nopena inisoldados cati mo-quetztoyaj tepanixco pejque techmaquiláj ica ininquietamin. Huajca mijque se quesqui ten mosoldados, huan nojquiya mijqui Urías nopa heteo tacat.

25 Huajca David quiilhui nopa tacat:

—Quej ni xiquilhui Joab: Amo ximo-cueso por cati panotoc. Quemantica mi-quipi soldados ipan tatehuistli quej nopa. San ximoyolilhui quenicatzá huelis tiquin-tetzopas teipa ica noja más soldados hasta tiquintzontamiltis nochí tocualancaitaca-hua. Quej nopa xijyolchicahua Joab.

26 Huan quema nopa sihuat cati eliyaya isihua Urías quicajqui para mictoya ihue-hue, motequipacho huan tahuel quicho-quila. 27 Huan quema tanqui nopa tonali para quichoquilis, David tatitanqui ma quihualiquilica ichaj huan quichijqui isihua. Huan teipa quitacatilti se oquichpil. Pero TOTECO quiitac para fiero ni tamanti cati David quichijqui.

Natán quiilhui David para tajtacolchijtoci

12 Huan TOTECO quititanqui itajtol-panextijca, Natán, ma quiitati Da-víd. Huan quema Natán ajsto iixpa David, quipohuili se camanali huan quiilhui:

—Ipan se altepet itztoyaj ome tacame; se tapipixquet huan se cati teicneltzi. 2 Huan nopa tapipixquet quinpiyayaya miyac huacaxme huan borregojme. 3 Pero nopa teic-neltzi amo teno más quipiyayaya, san se pil-sihuá borregojti cati quicojtoya huan qui-mocuitahuijtoya. Huan nopa pilborregojti

moscaltijtoya ihuaya iteco iconehua. Huan iteco quitamacayaya ica ten ya itacualis huan quiamacayaya ten itaza. Huan hasta cochiyaya imaco huan nopa tacat quiicnelyaya nopa pilsihua borregojtz quej elisquía se icon. ⁴Huan se tonali se tacat paxaloto ipan ichaj nopa tapijpixquet huan yaya amo quinejqui quimictis se huacax, o se borrego cati iaxca para quitamacas nopa paxalojquet, huajca nopa tapijpixquet yajqui qui cuijito nopa teicneltzi ipilborrego. Huan quimicti huan quicualtalili nopa paxalojquet.

⁵Huajca David quema quicajqui nopa huicalot, tahuel cualanqui ica nopa tacat cati tapijpixquet huan quiilhui Natán:

—Nelía quinamiqui ma miqui nopa tapijpixquet. ⁶Huan quinamiqui para quiuepilis nopa tacat teicneltzi nahui borre gojme quej ipataca nopa se cati quicuilijtoya, pampa quichijqui cati fiero huan amo tetasojtac.

⁷Huajca Natán quiilhui:

—¡Ta tiitztoc nopa tacat tapijpixquet! TOTECO Dios tiisraelitame mitzilhuía ya ni: ‘Na cati nimitztequitalijtoc titanahuatijquet ten Israel. Na cati nimitzmanahujtoc ten Saúl. ⁸Na nimitzmacac icaltanahuatil moteco Saúl, huan isihuajhua. Ni mitzmacac tanahuatili ica nochí israelitame campa hueli ipan tali Israel huan tali Judá. Huan sinta tiquitasquía nochí ya nopa para pilquentzi, nimitzmacatosquía tahuel más miyac. ⁹Huajca ¿para ten tijta huelecajtoc notanahuatil huan techixpanotoc ica ni tamanti cati tahuel fiero? Tijmicti Urías, nopa heteo tacat, huan tijcuili isihua. Tiquintequihui amonita tacame para ma quimictica. ¹⁰Huajca ama nochipa oncas tatehuilisti ipan mochaj ehuani pampa techtahuelcajtoc huan tijchijtoc mosihuacati eliyaya isihua Urías. ¹¹Na njichihuas para motelpocahua huan tacame cati itztoque mocajitic motananase para mitzte huise. Huan na nimitzcuilis mosihuajhua moiixa huan niquinmactilis sequinoc huan inijuanti cochise inihuaya miyacapa. ¹²Ta tijchijqui nochí ni tamanti ixtacatzi, pero na njichihuas miyacapa para nochí israelitame quimatisé.’

¹³Huajca David quiilhui Natán:

—Quena, nelía nitajtacolchijtoc iiipa TOTECO.

Huan Natán quiilhui:

—TOTECO mitztapojpolhuijtoc motajtacol huan amo timquis por ya ni. ¹⁴Pero pampa tahuel tiquixpanotoc TOTECO ica ni tamanti, tiquinchihuilijtoc icualancaitacahua TOTECO para quiuetzquilise huan quimahuispolose itoca. Huajca nopa mocone cati ontacatqui miquis.

¹⁵Huan Natán tacuepili ichaj. Huan TOTECO quimacac se hueyi cocolisti nopa conet cati isihuacahual Urías quitacatilti ica David. ¹⁶Huan David pejqui motatajtía huan quitajtani Toteco ma quichicahua nopa conet. Huan mosajqui huan mixtapa cho talchi seyo hual. ¹⁷Huan nopa huehue tacame cati más quipiyayayaj tequiticayot ipan icaltanahuatil yajque quiitatoj huan quiilhuijque ma mijquehua huan ma tacua inihuaya, pero David amo quinejqui.

¹⁸Huan quema ya panotoya chicome tonati, nopa conet mijqui, huan nopa tacame majmahuiyayaj quiilhuijse David. Mo ilhuiyayaj: “Quema noja yoltoya nopa conet huan tijyoltalisquíaj, ya amo quinejqui techtacaquilis, huajca ama sinta tiquilhui se para ya mijqui, huelis más fiero mochihuilis.”

¹⁹Huan quema David quiitac para mocamanalhuiyayaj ixtacatzi nopa tacame, quimachili para ya mictoya nopa conet. Huajca quintatzintoquili sinta ya mictoya nopa conet, huan quiilhuijque para, quena.

²⁰Huajca David mijquejqui campa huetztoya, huan mali, huan mopatac huan mocualtali. Teipa yajqui ipan itiopa TOTECO huan quihueyitali. Teipa tacuepili ichaj huan tacuajqui. ²¹Huan itequipanojcahua san quitachilijque huan quiilhuijque:

—¿Para ten quej nopa titachihua? Quema mocone noja yoltoya, amo titacuayaya huan tahuel tichocayaya. Huan quema mijqui, timijkejqui huan titacuajqui.

²²Huan David quinnanquili:

—Quema noja yoltoya nopa conet nichocayaya huan nimosahuayaya pampa

nimoilhuiyaya huelis Toteco Dios quipiyas hueyi iyolo ica na huan quichicahuas nocone. ²³Pero ama ya mijqui. ¿Para ten nimosahuas huan nichocas? ¿Huelis na sempa nijyolcuis? ¡Amo! Na niyas teipa campa yaya itztoc, pero yaya ayecmo tauepilis campa niitztoc na.

Tacatqui Salomón

²⁴Huan David quiyoltali isihua, Betsabé, huan cochqui ihuaya. Huan quipixqui seyoc icone cati quitocaxtali Salomón. Huan TOTECO quiicneli ni conet. ²⁵Huan TOTECO quitanqui Natán ma quiitati David. Huan pampa TOTECO quiicneli, Natán quiilhui ma quitocaxti nopa conet Jedidías. (Jedidías quinequi quiijtos Yaya Catí TOTECO Quiicnelía.)

David moaxcati altepet Rabá

(1 Cr. 20:1-3)

²⁶Huan Joab ica isoldados yajque huan quintehuijque nopa amonitame ipan altepet Rabá. Huan quitanque nopa pilaltepetzi campa huala nopa at cati quitequihuiyaya hueyi altepet Rabá. ²⁷Huajca Joab quintitanqui tacame para ma quiilhuitij David: “Ya nijyahualojtoc altepet Rabá huan niquincuilijtoc nopa altepet cati quimaca at altepet Rabá. ²⁸Huajca ama xiquinsentili nochí nopa israelita soldados cati mocajtoque huan xihualaca, ximoaxcatiquij ni altepet para ta tielis nopa tantaquet, huan amo quihuicas notoca na quej elisquía na nijtanqui.”

²⁹Huajca David quichijqui quej Joab quiilhuijtoya. Quinsentili nochí isoldados, huan yajqui ipan altepet Rabá huan quintehui. Huan moaxcati nopa altepet. ³⁰Huan quicuilijke icorona nopa tanahuatijquet huan quitalijke ipan itzonteco David. Huan nopa corona hueyi ipati eliya yaya pampa nochí elqui ten oro huan quipiyayaya piltetzitzi yejyectitzi cati pajpatiyo. Huan nopa corona quipixqui 33 kilos ietica. Huan nojquiya ipan nopa altepet mocuili David miyac tamanti cati patiyo. ³¹Huan David quinquitxi nopa amonitame cati mocajtoyaj yoltoque ipan nopa altepet huan quintali ma tequitica ica si-

erras, picos huan hachas. Huan nojquiya quinchijqui ma quichihuaca tabiques ipan hornos. Nojquiya quinchijqui itequipanocahua nopa amonitame ipan sequinoc altepeteme. Huan teipa David tacuepili ipan altepet Jerusalén inihuaya nochí isoldados.

Amnón quiichpocapolo Tamar

13 Huan David quipixtoya se itelpoca cati itoca Absalón huan yaya quipiyayaya se isihua icni cati tahuel yejyectzi eliyaya cati itoca Tamar. Huan ica seyoc isihua David quipixqui seyoc itelpoca cati itoca eliyaya Amnón. Huan Amnón nelía quiixtocac Tamar masque eliyaya itepotzicni. ²Huan Amnón nelpano quiixtocaya Tamar hasta mococoliscuic. Huan Tamar eliyaya se ichpocat huan ipan nopa tonali tahuel momatiyaya quinmocuitahuíaj ichpocame para amo aqui quinnechcahuis. Huajca yeca Amnón moilhuiyaya para elis ohui para quicajcayahuas. ³Huan Amnón quipiyayaya se ihuampo cati itoca eliyaya Jonadab cati eliyaya nojquiya imachicni pampa yaya eliyaya icone Simea, cati eliyaya iicni David. Huan Jonadab tahuel quimatiyaya quenicatza tacajcayahuas. ⁴Huan se tonali quiatzintoquili Amnón:

—Amnón, ta tiitelpoca nopa tanahuatijquet, ¿para ten más timocuesohua mojmosta? ¿Taya tijpiya? ¡Techilhui!

Huan Amnón quinanquili:

—Na niquixtoca Tamar, iicni Absalón.

5 Huajca Jonadab quiilhui:

—Na nimitzilhuis quenicatza tijchihuas. Ximotecati ipan motapech huan ximoco-coxcanequi. Huan quema yas motata David mitzpxaloti, xiquilhui quej ni: ‘Nimitztajtánia xijtitani noicni Tamar ma techcualtalili qui se tacualisti para nijcuas.’

6 Huajca quej nopa quichijqui Amnón. Huan quema itata yajqui quipaxaloto quiilhui:

—Nimitztajtánia para xijtitani noicni Tamar para ma techcualtalili qui noixpa se ome pantzi, huan ma techtamaca.

7 Huajca David quitanqui Tamar ichaj Amnón, huan quiilhui:

—Xiya ichaj moicni Amnón huan xij-cualtaliliti itacualalis para ma tacua.

8 Huan Tamar yajqui ichaj Amnón huan yaya mococoxcanectoya ipan itapech. Huan Tamar nimantzi pejqui quixa-cualohua harina, huan quichijqui pantzi huan quicxití. **9** Huan quema ya eltoya, quitequili itacualalis huan quihualiquili Amnón, pero ya amo quinejqui tacuas. Huan quinnahuati nochí itequipanojca-hua ma quisaca, huan nochí quisque. **10** Huan Amnón quiilhui Tamar:

—Ama, techhualiquili notacualalis nica ipan nocuarto huan techtamaca.

Huan Tamar quihuiquili. **11** Huan quem-a Tamar monechcahui campa Amnón itztoya, Amnón quinajnahuajqui huan quiilhui:

—Xicochiqui nohuaya.

12 Huan Tamar quinanquili:

—Amo, noicni, amo techfuerzajhui pampa tijmati se tajtacoli cati nelía fiero ipan total Israel. ¡Amo techixpano! **13** Amo quema tamis nopolnahualis. ¿Can-que niyas para nimotatis? Huan ica ta, te-ipa mitzixmatise quej se cati más tifiero ipan Israel. Más cuali san xijcamanalhui nopa tanahuatijquet para ma techcahuili timotahuicaltise huan temachtí techca-huilis.

14 Huan Amnón amo quinejqui quitaca-quilis. Huan pampa eliyaya más tetic, qui-fuerzajhui huan quiichpocapolo. **15** Huan nimantzi Amnón tahuel quicualancaitac ica se hueyi cualanti. Quicualancaitac te-ipa hasta quipanoc quej quiicnelyaya achtohui, huan quiilhui:

—Ximoquetza huan xiya.

16 Huan Tamar amo quinejqui quisas huan quiilhui:

—Noja más hueyi elis motajtacol para techquixtía que quema techixpanoc.

Pero Amnón amo quitacaquili, **17** huan quinotzqui se itequipanojca huan quiilhui:

—Xijquixti ni sihuat huan xijtzacua cuali nopa caltemit.

18 Huan itequipanojca quiqxiti Tam-ar. Huan yaya moyoyontijtoya cuali ica iyoyo huehueyac huan yejyectzi quej no-chi iichpocahua nopa tanahuatijquet mo-

quentiyayaj. **19** Huajca quitzayanqui iyoyo huan motalili cuajnexti ipan itzonteco huan mocuaitzquitijayqui huan chocati-yajqui.

20 Huan Absalón, iicni, quiilhui:

—¿Mitzixpanotoc Amnón? ¿Ax que? Ximoyoltali, noicni. Amo tahuel ximocue-so, pampa yaya moicni.

Huan Tamar mocajqui ichaj iicni Absa-lón. **21** Huan quema Tanahuatijquet David quicajqui cati quichijtoya Amnón, tahuel cualanqui. **22** Huan Absalón tahuel qui-cualancaitac Amnón por nopa tajtacoli ca-ti quichihuili iicni, Tamar, pero amo teno quiilhuiyaya.

Absalón quimicti Amnón cati eliyaya iicni

23 Teipa quema ya panotoya ome xi-huit, itequipanojcahua Absalón yajtoyaj Baal Hazor ipan tali Efraín para quinxima-se iborreojhua. Huan Absalón quinnotz-qui nochí iicnihua ma yaca para ilhuichi-huatij. **24** Huan Absalón nojquiya yajqui quiitato itata, Tanahuatijquet David, huan quiilhui:

—Notequipanojcahua yajtoque quinximati-j noborreojhua huan nijnequi para ta xiitzto nohuaya huan nochí motapale-huijahua.

25 Huan David quinanquili:

—Amo, nocone, amo huelis tiyase tino-chi, pampa tahuel ohui elis para ta.

Huan masque Absalón nelchicahuac quitajtani ma yahui, David amo quinejqui yas, pero pajqui para quichihuayaya nopa ilhuit huan quitiochijqui. **26** Huan Absalón quiilhui:

—Sinta ta amo hueli tiyas, nimitztajta-nía xijtitani noicni Amnón.

Huan David quiilhui Absalón:

—¿Para ten tijnequi ma yahui moicni Amnón?

27 Pero pampa Absalón quisenhuiquili quitajtánia, David quicajqui ma yahui Amnón huan nochí itelpocahua. **28** Huan Absalón quinilhuijtoya itequipanojcahua: “Quema anquitätse para Amnón ya cuali taitoc huan nimechilhuis para xijmictica, huajca amo ximomajmatica. San ximoyol-

chicahuaca huan ximotemacaca xijchi-huaca nocamanal."

²⁹Huan itequipanojehua Absalón qui-mictijke Amnón quej quinilhuijtoya. Huan teipa nochí itelpocahua Tanahuatij-quet David moquetzque huan tejcoque ipan inimula huan cholojque.

³⁰Huan quema injuanti noja hualaya-yaj ipan ojti, ajisco campa David se tacat cati quihualiquiliyaya se camanali, huan quiijto: Absalón quinmicti nochí motelpocahua huan yon se amo mocajqui yoltoc. ³¹Huajca David tahuel mocueso huan qui-tzayanqui iyoyo huan motejqui talchi huan nochí itequipanojehua nojquiya quichijque. ³²Huan teipa tananquili Jona-dab, icone Simea cati elqui iicni David, huan quiilhui:

—Tanahuatijquet David, amo ximoil-hui para nochí mocone-hua quinmictijke. San Amnón quimictijke, pampa Absalón motemacatoq quimictis ipan nopa tonali quema quixpanoc iicni, Tamar. ³³Huajca ama, amo xijneltoca ne camanali para nochí motelpocahua mictoque, pampa san Amnón mijqui.

³⁴Huan Absalón cholo. Huan nopa tel-pocat cati tachixtoya tepanixco quiitac pa-ra monechcahuiyayaj miyac tacame cati hualayayaj ipan ojti. ³⁵Huajca Jonadab quiilhui Tanahuatijquet David:

—Xiquita, ya hualahuij motelpocahua quej nimitzilhuijtoc.

³⁶Ipan nopa talojtzi ajiscoj itelpocahua David, huan nochí pejque chocaj. Huan David huan nochí itequipanojehua noj-quiya choaque chicahuac.

³⁷Huan Absalón cholo huan yajqui ipan altepet Gesur campa itztoya Tanahuatijquet Talmai, icone Amiud. ³⁸Huan npona mocajqui eyi xihuit. ³⁹Huan Da-vid mojmosta mochoquiliyaya pampa qui-temohuayaya Absalón, huan ya moyol-tlijtoya para mijqui Amnón.

Absalón tacuepili Jerusalén

14 ¹Huan quema Joab, icone Sarvia, quiematqui para Tanahuatijquet Da-vid tahuel quinequiyaya quitas icones, Ab-salón, ²huajca tanahuati ma quicuitij se

sihuat ten pilaltepetzi Tecoa pampa ta-huel talnamiquiyaya. Huan Joab quiilhui quenicateza ma quiilhuiti nopa tanahuatij-quet, quiijto: "Ximoyoyonti huan ximo-chihua quej tijpiya miyac tequipacholi. Amo ximoyejyeccihua para quej nopa ti-nesis para ya huejcajtoc tijpiya tequipa-choli pampa acajya mijqui. ³Huan xiya iixpa nopa tanahuatijquet huan tiquilhuis quej nimitzilhuis."

Huan Joab quiilhui nochí cati quine-quiyaya ma quiilhuis David. ⁴Huan nopa sihuat ten Tecoa yajqui quiitato Tanahuatijquet David. Huan quema ajiso, mohuj-tzonqui hasta talchi ica miyac tatepanita-cayot huan quiilhui:

—Techpalehui, Tanahuatijquet.

⁵Huan David quiilhui:

—¿Taya tijpiya?

Huan ya quinanquili:

—Na niicnotzi pampa nohuehue ya mij-qui. ⁶Huan niquinpiyayaya ome nocone-hua. Huan se tonali motehuijque campa te-quitiyayaj huan amo aqui quinmanahui. Huan se ten injuanti quimicti iicni. ⁷Huan ama nochí nochan ehuani techcualancaitaj huan quinequij ma niquinmactili nocone cati quimicti iicni para nojquiya quimictise quej ya quimicti iicni. Pero sintia niquin-mactilis, ayecmo njipiwas yon se aqui ipan taltipacti huan ixpolihuis itoca nohuehue.

⁸Huajca Tanahuatijquet David quiilhui nopa sihuat:

—Xiya mochaj huan na nitanahuatis para amo aqui huelis quicocos.

⁹Huan nopa sihuat quiilhui Tanahuatijquet David:

—Ma huetzi nopa tajtacoli ipan na huan ipan notata. Huan ta titanahuatij-quet amo tijhuicas tajtacoli ipan ni tamani-ti, yon motanahuatl.

¹⁰Huan David quiilhui:

—Sinta se acajya mitzcuatotonis por motelpoca, techhualiquili huan ayecmo quema mitzcuatotonis.

¹¹Huan nopa sihuat sempa quiilhui:

—Nimitztajtanía iixpa TOTECO Dios cati tijtequipanohua para ma amo aqui qui-micti nocone. Na ayecmo njinequi ma on-ca miquilsti.

Huan David quiilhui:

—Nelía nimitzilhuí yon se tamanti amo quichihuile mocone.

12 Huan nopa sihuat sempa quiilhui:

—Techcahuili nimitztatzintoquilis se-yoc tamanti.

—Techilhui —quiilhui David.

13 Huajca nopa sihuat quiilhui:

—¿Para ten amo tiquinchihuilis sequinoc israelitame cati tiquijtojtoc techchihuilis na huan nocone? Pampa ica cati tiquijtojtoc timotajtacolmacac ica moseli. Ta nojquia amo tijcahuilijtoc ma tacuepili mocone, Absalón, cati mohuejcatalijtoc.

14 Nochi tojuanti timiquise se tonali. Tonemilis amo huejcahua. San eltoc quej at cati toyahui talchi huan amo aqui hueli quisentilia. Huan Toteco Dios amo quimictia se cati mohuejcatalijtoc, yaya quitemohua quenicateza quicuepaltis sempa. **15** Pero na nihualajqui moixpa pampa nochi nopa masehualme techmajmatijque na huan nocone huan quinequij techmictise. Huan nimoilhui para nimitzitaqui para techmanahuisquía. **16** Pampa noselti nimoilhui: Quema nopa tanahuatijquet qui-caquis cati niitequipanojca niqualhuá, techmanahuis ten nopa tacame cati quinequij techtzontamiltise na huan nocone, huan techixpolose ipan ni tali Israel cati Toteco Dios techmacatoc. **17** Huan nojquia nimoilhui: Quena, nopa tanahuatijquet techyoltalis ica cati techilhuis, pampa yaya itztoquej iilhuicac ejca Toteco Dios cati quimachilía cati cuali huan cati fiero. TOTECO Dios cati moTeco ma itzto mohuaya.

Quej nopa quijito nopa sihuat.

18 Huan David quilhui nopa sihuat:

—Nijnequi nimitztatzintoquilis se tamanti. Amo teno techneltatili, san techilhui cati melahuac.

—Cualtitoc, notanahuatijca, techilhui taya tijnequi tijmatis —quinanquili nopa sihuat.

19 Huan David quiilhui:

—Techilhui sintia Joab mitztitancoc.

Huan nopa sihuat quinanquili:

—Quena, Joab techtitani qui huan yaya techilhui quenicateza ma nimitzcamanal-

hui. **20** Huan quichijqui nochí para timomacas cuenta ten ni tamanti huan quenicateza elisquía sintia tijtajtolsencahuayaya seyoc masehuali icone. Pero ta tahuel titalnamiqui quej se iilhuicac ejca Toteco huan tijmati nochí cati pano.

21 Huajca David quinotzqui Joab huan quiilhui:

—Cualtitoc, xiya huan xiquilhuiti Absalón ma huala.

22 Huan Joab mohujtzonqui hasta talchi, huan quitiochijqui Tanahuatijquet David huan quiilhui:

—Ama nijmachilijtoc para techta sojta pampa tijchijtoc quej nimitztajtaniyaya.

23 Huajca Joab motananqui huan yajqui altepet Gesur campa itztoya Absalón huan sempa quihualicac ipan Jerusalén. **24** Huan David quichijqui ni tanahuatili: “Quema ajsis, xiquilhuica Absalón para ma ajsiti ichaj, pero ma amo moixnexiti campa nochaj, pampa amo nijnequi niqutas.”

25 Huan Absalón eliyaya nelía yejyectzi huan ipan nochí tali Israel amo oncayaya seyoc quej ya. Nochi itacayo ten iicxi hasta itzoncal ipan itzonco, amo teno cati amo cuali quipixqui; senquisa cuali nochí itacayo. Huan nochí israelitame quihueyichihuayayaj. **26** Huan itamiya sesen xihuit motequiliyaya itzoncal pampa etic, huan ietica eliyaya ome kilo huan tajco. **27** Huan Absalón quinpiyayaya eyi io-quichpilhua huan se isihuapil cati quito-caxtalijtoya Tamar, huan Tamar nojquia mochijqui se sihuat tahuel yejyectzi.

28 Huan mocajqui Absalón ome xihuit huan tajco ipan altepet Jerusalén huan amo quiitac ixayac itata, Tanahuatijquet David. **29** Huajca Absalón tatitanqui ma quinotzatij Joab para ma yahui quiitati Tanahuatijquet David huan ma quicamanalhui por ya. Pero Joab amo quinejqui yas. Huan ica ompa quinotzqui huan sempa amo quinejqui. **30** Huajca teipa Absalón quinnahuati itequipanojcahua ma quitatitij imil Joab campa quitoctoya cebada pampa imil Joab mocahuayaya iteno imil Absalón. Huan itequipanojcahua yajque quitatitoj. **31** Huajca Joab yajqui quiitato Absalón huan quiilhui:

—¿Para ten motequipanojchahua yaj-que techtatilitoj nomil campa nijtoctoya cebada?

32 Huan Absalón quinanquili:

—Pampa na nitatitancoc para ma mitz-notzatij huan para tihualasquía nica. Ni-mitztitanisquía xiquitati Tanahuatijquet David. Nijnequi xijtatzintoquili para ten nechquixti ipan altepet Gesur sinta amo quinequiyaya techitas. Más cuali nimocajtosquía nepa. Na nijnequi ma nechcahuili niquitas huan sinta quiita para nijhuica tajtacoli, ma techmicti.

33 Huan Joab yajqui quipohuitlo David nochí quej quiilhuijtoya Absalón. Huan Da-víd tanahuati ma quinotzatij Absalón. Huan quema Absalón ajscico iixpa David mohuij-tzonqui hasta talchi quej momatque quichi-huaj, huan David quitzoponi.

Absalón quinsentili soldados ten majtacti familias

15 Huan quema panotoyaya tonali, Absalón mocohui se topes carro quej se tanahuatijquet, huan mocohui ca-huayojime para quitilanase huan 50 tacame para motalose iixpa para teyolme-lahuase para huala. **2**Huan Absalón pejqui mijquehua ijnaltzi mojmosta huan pejqui moquetza campa caltemit ipan itepa nopa altepet. Huan quema hualayaya se acajya para quiitas tanahuatijquet David pampa quiipyayaya se cualanti, Absalón quinoj-notzayaya ica cuali huan quiilhuiyaya: ¿Ten taya altepet tihuala? Huan yaya cati ajsiyaya quiilhuiyaya para eli se israelita. **3**Huan teipa Absalón quiilhuiyaya: “Nelía cuali cati tiquijtohua huan, quena, quinamiqui para se mitztajtolencahuas. Pero Tanahuatijquet David amo quitalijtoc yon se para mitzpalehus ipan ni tamanti.” **4**Tahuel techpactisquía sinta techtequita-lisquíaj na para nimechtajtolencahuas. Quej nopa nochí cati quipiyasquíaj se cu- lanti hualasquíaj techitaquij huan na ni-quintajtolencahuasquía xitahuac. **5**Huan sinta se acajya hualayaya huan mohuijtzo-mayaya iixpa Absalón, ya amo quicahuili-yaya. Nimantzi quimaitzquiyaya huan quitzoponiyyaya. **6**Huan quej nopa quichi-

huayaya ica nochí israelitame cati hualayayaj campa nopa tanahuatijquet para ma quinsencahuili se tenijqui. Huajca yeca Absalón quichijqui para nochí israelitame cati hualayayaj ipan tali Israel ma quiic-nelica.

7Huan quema quiaxiti nahui xihuit pa-ra ajsitoya ipan Jerusalén, Absalón quiilhui David:

—Nimitztajtanía techcahua niyas ipan altepet Hebrón nijmacati tacajcahualisti Toteco, pampa quej nopa nimocajtoc ica TOTECO. **8**Pampa quema niitzyota ipan altepet Gesur niquilhui TOTECO sinta nechcahuilisquía nihualas nica ipan altepet Je-rusalén, huajca nijtequipanos huan nijma-cas tacajcahualisti.

9Huan Tanahuatijquet David quiilhui:

—Cualtitoc, xiya huan xijchihua quej tiquijtojtoc.

Huan Absalón yajqui ipan altepet He-brón. **10**Huan quema Absalón ya ajositoya Hebrón quintitanqui tacame ipan nochí altepeme campa itztoyaj israelitame huan quinilhuijque para ma quitacaquilise se tapitzali. Huan quema quicaquise molinis tapitzali, quimatise para Absalón quite-quitajtoque ipan altepet Hebrón para elis tanahuatijquet ipan tali Israel huan mone-qui teyolmelahuase. **11**Huan nojquiya Ab-salón quinnotztoya 200 tacame ipan Jeru-salén para ma yaca tacuatij ihuaya. Huan inijuanti amo teno quimatiyaya taya te-ipa quichihuasquía Absalón. **12**Huan que-ma Absalón quitatiyaya tacajcahualisti, nojquiya tatitanqui ma quinotzatij Ahito-fel ten ialtepe Gilo. Yaya eliyaya se cati quiconsejomacayaya David. Huan Ahito-fel ajscico huan moiycatali ica Absalón. Huan nopa masehualme cati quitoquiliyaya Absalón momiyaquiliyaya pampa ta-huel miyac israelitame calaquiyaya ihua-ya hasta quipixque miyac chicahualisti.

David cholo ten Jerusalén

13Huan ajscico se tacat cati quiilhuico David para nochí israelitame ipan tali Is-rael quitoquiliyaj Absalón quej inintana-huatijca. **14**Huajca David quinilhui nochí itapalehuicahua cati itztoyaj ihuaya:

—Ma tiisihuica ticholose para timomana huise, pampa sinta amo, yon se ten tojuanti huelis cholos. Xiisihuica para amo techajsis, pampa sinta techajsis nica, techtamimictise cati tiitztoque ipan ni altepet.

15 Huan nochí itapalehuijcahua qui nanquiliique:

—Tiitztoque mohuaya huan tijchihua se cati ta tiquita para cuali.

16 Huan nimantzi quisqui Tanahuatijquet David ica nochí ichaj ehuani. San quincajqui majtacti isihuajhua para qui mocuitahuise nopta caltanahuatili. 17 Huan quema quistiyahuyayaj Tanahuatijquet David ica nochí imasehualhua, moquetzque iteno nopta altepet. 18 Huan panoque nochí nopta soldados para quintayacanaltise. Huan itztoyaj nojquiya nochí nopta soldados cati quimocuitahuyayaj nopta tanahuatijquet huan cati matalohuayayaj para quihuicase camanali huan temachiltise. Huan 600 tacame cati quistoyaj ipan altepet Gat huan ixchinejmentoyaj hasta Jerusalén nojquiya panoque. 19 Huan David quinotzqui Itai cati quinya canayaya nopta altepet Gat ehuani huan quiilhui:

—¿Para ten tihualajtoc nica? Más cuali para titacuepilis ipan Jerusalén, huan ximocahua ihuaya nopta yancuic tanahuatijquet. Ta tiehua seyoc tali huan huejca moaltepe. 20 San tionajsico huan amo quinamiqui para nimitzchihualtis ticalaquis ica tojuanti. Yon amo njimati canque tiajsitj. Más cuali para xitacuepili huan nojquiya nochí injuanti cati hualajtoque mohuaya. Huan ma TOTECO mitziochihua huan ma itzto mohuaya nochipa.

21 Huan Itai quinanquili:

—Na njitestigojquetza Toteco Dios, para campa hueli ta tiyas, na niyas mohuaya, masque nimiquis mohuaya o noja niitztos.

22 Huajca Tanahuatijquet David qui nanquili:

—Cualtitoc, xitayacantiyaca huan anyase tohuaya.

Huan Itai huan nochí isoldados, huan ichaj ehuani, huan iconehua yajque ihuaya David. 23 Huan oncac se hueyi choquisti ipan nochí nopta tali quema Tanahuatijquet

David huan nochí cati itztoyaj ihuaya quisque. Huan quiixcotonque nopta atajti Cederón para calaquise ipan nopta huactoc tali. 24 Huan inihuaya yahuiyayaj nojquiya nopta totajtzitzi Abiatar huan Sadoc huan nochí nopta levitame. Huan injuanti quihuicayayaj icaxa Toteco Dios huan quitalijque ojentí hasta quema nochí panoque. 25 Huan Tanahuatijquet David quiilhui Sadoc:

—Xijhuica icaxa Toteco Dios sempa ipan altepet Jerusalén huan sinta TOTECO nechcahuilis, nitacuepilis huan sempa niquitas icaxa Toteco huan iYoyon Tiopa. 26 Huan sinta TOTECO techilhuis para ayecmo quipactía cati njichihua, huajca ma techchihuili cati yaya quinequi.

27 Huan nojquiya Tanahuatijquet David quiilhui nopta totajtzi Sadoc:

—¿Amo ta tise tachixquet? Nimitzilhuía sempa xiya ipan Jerusalén quema amo aquí mitzita huan xiitzto ica mocone, Ahimaas, huan ica Jonatán, icode Abiatar. 28 Huan na nimitzchiyas nica huan ayemo nicalaquis ipan nopta huactoc tali hasta quema antechyolmelahuase taya pano ipan nopta altepet.

29 Huajca Sadoc huan Abiatar sempa quihuicaque icaxa Toteco Dios ipan Jerusalén, huan nopona mocajque. 30 Huan David ixtejcoc nopta taixtejcolis ipan nopta tepet Olivos. San chocatiyajqui huan motzontzactiyajqui, yon amo quihuicayaya itecac, pampa tahuel motequipachohuayaya. Huan nochí cati itztoyaj ihuaya nojquiya motzontzajque huan chocatinenque. 31 Huan teipa se quiilhui David para Ahitofel nojquiya matalijtoya ihuaya Absalón. Huajca David motatajti ica TOTECO huan quiilhui: “Se favor, TOTECO, xijchihua para icamanal Ahitofel ma nesi quej camanali cati amo teno ipati para amo aquí quichihuas cati quijtuhua.”

32 Huan quema David ajsito iixco nopta tepet campa masehualme quihueyitaliyayaj Toteco Dios, quinamijqui se huehuentzi itoca Husai ten nopta familia Arquita. Quihualicayaya iyoyo tzayantoc huan tali ipan itzonteco pampa tahuel mocuesohuayaya ten cati ipantic David. 33 Huan David quiilhui:

—Achi cuali amo xicholo tohuaya, pampa monequi timitzhixtiyase. ³⁴Más cuali sempa xiya Jerusalén huan xiquilhui notelpoca Absalón para tijtequipanos. Xiquilhui para miyac xihuit techconsejomacayaya huan techtequipanohuayaya huan ama tipalehuis ya. Huan quej nopa quema Ahitofel quilihuis ma quichihua se tenijqui, ta tiquilhuis ma quichihua seyoc tamanti para amo quitoquilis icamanal Ahitofel. ³⁵Huan nojquiya itztoque ipan Jerusalén nopa totajtitzí Abiatar huan Sadoc cati mocahuaj tohuaya. Xiquinilhui nochí cati tijcaqui cati Absalón quisencahua para quichihuas. ³⁶Huan inijuanti quipiyaj ome ininconeuhua cati itztoque nopona inihuaya: Jonatán, icone Abiatar huan Ahimaas, icone Sadoc. Huajca hueli techtitanicilise ininconeuhua para ma techmachiltica nochí cati anquimati.

³⁷Huajca Husai ihuampo David yajqui ipan altepet Jerusalén huan ajsito quema Absalón calactiyahuiyaya ipan nopa altepet.

Siba quiistacahui David

16 Quema David sanoc pejtoya ixtemo ten nopa tepet, quinamijqui Siba cati eliyaya itequipanojca Mefi Boset. Huan quinhuicayaya ome burrojme cati quintamamaltijtoya ica 200 pantzi, 100 tatecti ten xocomecat, 100 pantzi ten higos huactoc huan se cuetaxti temitoc ica xocomeca at. ²Huan David quitatzintiquili Siba:

—¿Para ten tijhualica nochí ya ni?

Huan Siba quinanquili:

—Ni burrojme niquinhalicatoc para ma ipan tejococa mochan ehuani, huan ni pantzi para ma quicuaca mosoldados, huan ni xocomecat iayo nojquiya para ma quiica cati siyahuij ipan huactoc tali.

³Huan David quilhui Siba:

—¿Huan canque itztoc Mefi Boset, moteco?

Huan Siba quinanquili:

—Mocajqui Jerusalén, pampa quijito ama huelis mochihuas tanahuatijquet. Huan quej nopa sempa moaxcatis itanahuatilis ihueyi tata.

⁴Huan David quilhui Siba:

—Huajca na nimitzmactilía ama nochí cati iaxca Mefi Boset.

Huan Siba mohujtzonqui hasta talchi iiipa quej quihueyitepanitayaya. Huan quitascamatqui huan yajqui.

Se tacat ten altepet Bahurim quitelchijqui David

⁵Teipa Tanahuatijquet David huan nochí cati itztoyaj nejenenque ihuaya hasta ajsitoj ipan se altepet itoca Bahurim. Huan nopona quisqui se tacat cati eliyaya se iteixmatca mijcatzi Saúl huan itoca eliyaya Simeí huan elqui icone Gera. Huan nopa tacat Simeí quitelchihuayaya, ⁶huan quimajcahuiliyaya tet Tanahuatijquet David huan nochí itequipanojcahua cati ihuaya yahuiyayaj. Nojquiya quinmajcahuiliyaya tet nopa huejhueyi soldados cati quimocuitahuiyayaj David ipan sese lado. ⁷Huan ya quitelchihuayaya Tanahuatijquet David huan quilihuiyaya:

—¡Xiya, xiya tifero tacat! ¡Titemictijquet! ⁸TOTECO mitzcuepilijtoc pampa tiquinmicti ichaj ehuani Saúl, huan timocuili itanahuatil huan nochí cati eliyaya iaxca. Huajca ye ca ama TOTECO quimacatoc motanahuatil mocone, Absalón, pamapa tifero huan tijtoyajqui miyac esti.

⁹Teipa Abisai, icone Sarvia, quilhui Tanahuatijquet David:

—Techcahuili ma nijquechtzontequivi ne huihui tacat. ¿Para ten yaya cati itztoya quej se chichi cati mictoc ma mitzelchihua quej ni? Ta titanahuatijquet.

¹⁰Huan David quinanquili:

—¡Amo! Amo ximocalaquica ipan nitamanti, aniconehua Sarvia. Huelis TOTECO quilhuijtoc ma nechtelchihua. Huan sintia quej nopa, ¿ajquiya tojuanti para tiqualhise ma amo quichihua?

¹¹Huan David quilhui Abisai huan nochí itequipanojcahua:

—Xiquitaca, Absalón nocone cati quisqui ipan notacayo quinequi nechmictis, pero ni tacat cati iixhui Benjamín cati amo quema itztoya tohuaya san nechtelchihua. Amo teno xijchihuilica pampa huelis TOTECO quinahuatijtoc ma quichihua.

12 Huan teipa huelis TOTECO nechitas para amo notajtacol nopa tamanti cati ica nechtelchihuayaya huan huajca, quena, Toteco nechtiocihahuas por ni tatechihualisti cati ama nijpanti.

13 Huan David huan nochí itequipanoj-cahua panotiyajque ipan iniojhui, huan nopa tacat Simei quintoquiliyajqui ipan se lado ten se tepet. Huan quintelchijityajqui, huan quinmajcahuiliyajqui tet huan taltepocti. **14** Huan Tanahuatijquet David huan nochí imasehualhua ajsitoj campa yahuiyajay tahuel siyajtoque huan mocajque nopona se quentzi para mosiyajquetzase.

Absalón quitanqui altepet Jerusalén

15 Huan Absalón huan nochí nopa tacame cati itztoyaj ihuaya calajque ipan Jerusalén, huan Ahitofel itztoya inihuaya. **16** Huan Husai ihuampo David quinamiquito Absalón huan quihueyichijqui huan quiilhui:

—Xihuejcahua xiitzto, titotanahuatijca.

17 Huan Absalón quiilhui:

—¿Quej nopa tijtascamati mohuampo David? ¿Para ten amo tiyajqui ihuaya?

18 Huan Husai quiilhui Absalón:

—¡Amo! Amo nihueli pampa na nimo-cahuas mohuaya ta. Mitztapejpenijtoc TO-TECO, huan ni masehualme nica huan nochí israelitame campa hueli para tielis titanahuatijquet. **19** Huajca ¿para ten amo nimitzequipanos? ¿Amo quinamiqui nimitzpalehuis ta cati tiicone David? Quena, quej nijtequipano motata David, nojquiya nimitzequipanos ta.

20 Huan teipa Absalón yajqui quiitato Ahitofel cati teconsejomaca huan quiilhui:

—Techilhui taya nijchihuas.

21 Huan Ahitofel quiilhui:

—Xicochi inihuaya isihuajhua motata David cati quincajtoc para quimocuitahui-se nopa caltanahuatili. Huan quej nopa nochí israelitame quimatise para tahuel tijcualancamacatoc motata huan ayecmo hueli anmoyoltalise. Huan huajca nochí cati mitztoquilíaj más moyolchicahuase.

22 Huajca imasehualhua quichijque se-yoc cuarto para Absalón iixco ichaj David.

Nopona Absalón cochqui inihuaya isihuaj-hua itata huan nochí israelitame quiita-que. **23** Huan Absalón quichihuayaya nochí cati Ahitofel quillhuiyaya quej itata, David, nojquiya quichijqui. Pampa nochí icamanal Ahitofel elqui temachti quej quistosquía ipan icamac Toteco Dios.

Husai amo quicahuili Ahitofel ma quimicti David

17 Huan nojquiya Ahitofel quiilhui Absalón:

—Techcahuili ma niquinhuicas 12 mil soldados huan tijtemose David ni yohuali.

2 Nicajsis quema ya siyajtos huan amo qui-piyas fuerza para momanahuis. Huan nopa tacame cati itztoque ihuaya momajmatise huan cholose huan huajca nijmictis san David. **3** Huan niquincuepas nochí imasehualhua ica ta, huan moyoltalise huan oncas paquillisti. Pampa nochí israelitame mitztoquilise sintia ayecmo itztos David.

4 Huan Absalón huan nochí nopa hue-hue tacame quiijtoque para cuali cati Ahitofel quiijtojtoya para quichihuas.

—Pero Absalón quiijito:

—Ma tijnotzase nojquiya Husai ten ichaj ehuan Arquita, huan tijcaquise taya consejo techmacas ica cati quiijtojtoc Ahitofel.

6 Huan Husai ajisco huan Absalón quiilhui:

—Ahitofel quiijtojtoc para quej ni tij-chihuase. ¿Quenicatza timoilhuía ta? ¿Cuali tijchihuase o amo?

7 Huan Husai quinanquili:

—Nimoilhuía para ni huelta huelis amo cuali cati Ahitofel quiijtojtoc. **8** Tij-mati motata, huan nochí nopa soldados cati itztoque ihuaya, tahuel mosemacaj. Nimantzi tahuel cuanise quej se tenan osa cati itztoque cuatita huan quicuilijtoque iconehua. Motata quipanotoc miyac tate-huilsti huan tahuel quimati quenicatza tatehuis. Yaya amo cochi campa itztoque nopa sequinoc imasehualhua. **9** Niquita para ya motatijtoc ipan se ostot o se lugar ixtacatzi, huan sintia yasquíaj mosoldados ama quitepotij, yaya quisas huan quinte-

tzopas huan quinmictis. Huan nimantzi nochi quicaquise nopa camanali para quinmictijque ta momasehualhua.¹⁰ Huan moyolmajmatise momasehualhua, masque ama tahuel motemacaj huan quipiyaj iniyolo quej se tecuani. Sinta moyolmajmatise, ayecmo quinequise tatehuise pampa nochi israelitame quimatij para motata tahuel quipiya tetili huan isoldados nojquiya.¹¹ Na nimitzilhuía para achtohui xiquinsentili nochi israelita soldados ten campa hueli. Xiquinsentili cati itztoque ipan altepeme ten tali Dan ica huejcapa hasta cati itztoque ipan altepet Beerseba ica tatzinta. Huan ica ya nopa, quena, tiquinpiyas tahuel miyac mosoldados quej imiyaca xali iteno hueyi at, huan ta tiquinyacanas ipan tatehuilisti.¹² Huan quej nopa, quena, tipantitij motata ipan cati hueli lugar campa itztos, huan tiquintetzpatij quej quema huetzi ajhuechti ipan nochi cati onca. Huan quej nopa nochi tiquinmictise. Huan amo aqui mocahuas yoltoc, yon motata.¹³ Huan sinta inijuanti motatitij ipan se altepet, tiyase tinochi ica lazo hasta tijssolose nopa tepamit huan tijtilanase sesen tet cati eliyaya ipan nopa tepamit hasta campa tamayamit. Amo tijcahuase yon se tet cati mosehujitos ipan seyoc.

¹⁴ Huajca Absalón huan nochi nopa israelitame quijitoque para más cuali cati Husai quijitojtoya huan amo cati Ahitofel quijitojtoya. Pampa TOTECO quichijtoya para amo quipatiitasquíaj cati Ahitofel quijitojtoya para ma huala cati fiero ipan Absalón.

¹⁵ Huan Husai quinilhuito nopa totajitzitzi Sadoc huan Abiatar nopa camanali ica cati Ahitofel quiconsejomacac ma quichihuaca Absalón huan nopa huehue tacame ten Israel. Nojquiya Husai quinilhui cati ya iseli quinilhujitoya ma quichihuaca.¹⁶ Huan nojquiya quinilhui:

—Xijtitanica se acajya nimantzi para ma quiilhuiti David ma amo mocahuaca npona, pero ma quiixcotonaca hueyat Jordán. Pampa sinta amo, quimictise totanahuatijca huan nochi masehualme cati itztoque ihuaya.

¹⁷ Huan Jonatán huan Ahimaas mocahuayayaj altepeteno campa itoca En Rogel para amo aqui quintasquía sintia calaquiyyayaj Jerusalén. Huan ya quisencajtoyaj para se sihua tequipanojquet ma quinmacati camanali, huan inijuanti quiyolmela-huasquíaj Tanahuatijquet David.¹⁸ Pero quema Jonatán huan Ahimaas quisque ten En Rogel para quiilhuitij David, se telpocat quinitac huan yajqui quiilhuito Absalón. Huajca nopa telpocame moisihuitijque huan ajsitoj ichaj se tacat ipan altepet Bahurim cati quipiyayaya icalixpa se ameli cati amo quipiyayaya at. Huan npona calajque huan motatijque.¹⁹ Huan isihua nopa tacat quitentzajqui nopa ameli huan ipani quihuatzqui trigo. Huan amo aqui quimatqui sintia itztojaj amelco.²⁰ Huan quema ajsicoj isoldados Absalón huan quitatzintoquilijque nopa sihuat:

—¿Canque itztoque Ahimaas huan Jonatán?

Huan nopa sihuat quijijo:

—Ya quiixcotonque nopa pilatajtsi huan yajque.

Huajca nopa soldados yajque quintemotoj, pero amo quinpantijque. Huan sempa tacuepilijque Jerusalén.

²¹ Huajca teipa Jonatán huan Ahimaas quisque huan yajque quiilhuitoj David para ma quisaca huan ma quiixcotonaca hueyat Jordán pampa Ahitofel quinequiyaya para nopa yohuali yasquía quinmictiti.²² Huajca nimantzi David huan nochi cati itztojaj ihuaya quisque huan quiixcotonque hueyat Jordán. Huan quema tanesqui nochi ya itztojaj seyoc nali, huan amo aqui mocajtoya.

²³ Huan quema Ahitofel quiitac para Absalón amo quichijqui cati ya quiilhuitoja ma quichihua, tejcoc ipan iburro, huan yajqui ichaj ipan ialtepe. Teipa quiqualtali nochi tamanti huan moquechcuapilotlo huan mijqui. Huan quitalpachojque campa itata quitalpachojtoyaj.

David ipan Mahanaim

²⁴ Huan David ajsito altepet Mahanaim. Huan Absalón huan nochi nopa israelita soldados cati mosentilijtoyaj ihuaya

quiixcotonque hueyat Jordán para quitoquilise.²⁵ Huan Absalón quitalijtoya Amasa ma quinyacana isoldados ipataca Joab cati quinyacanayaya isoldados David. (Inana Joab eliyaya Sarvia. Huan Sarvia quipixqui se isihua icni cati itoca Nahas cati quipixqui se iichpoca cati itoca eliyaya Abigail. Huan se ismaelita tacat itoca Itra quiconemamac Abigail huan quej nopa tacatqui Amasa. Huajca Amasa eliyaya imachicni Joab.)

²⁶ Huan Absalón huan nochí israelita soldados mochihuatoj ipan tali Galaad. ²⁷ Quema David ajsito altepet Mahanaim nimantzi quinamiquicoj Sobi, Maquir huan Barzilai cati quihualiquiliyayaj miyac tamanti. (Sobi elqui se amonita tacat cati eliyaya icono Nahas ipan altepet Rabá. Huan Maquir eliyaya icono Amiel ten altepet Lodebar. Huan Barzilai ehua altepet Rogelim ipan tali Galaad.) ²⁸ Huan injuanti quihualiquiliyayaj tapecchme, tazas, chachapali, trigo, cebada, harina, huan sinti cacatztic, et, lentejas, ²⁹ necti, mantea, queso huan borrejome. Huan nochí quihualiquiliyayaj David huan imasehualhua para ma quicuaca, pampa moilhuiyaj; huelis mayanaj, huan siyahuij, huan amiquij, pampa panoque ipan nopa huatoc tali campa amo teno onca.

David mocualtali para tatehuilisti

18 Huan David quincualtali nochí isoldados cati ihuaya itztoyaj huan quintali tayacanani ipan sesen mil soldados huan ipan sesen cien soldados. ² Huan teipa David quinxelo isoldados cati itztoyaj ihuaya ica eyi pamit. Huan Joab quitali ma quinyacana se pamit, huan seyoc pamit quimacac Abisai cati eliyaya icono Sarvia huan iicni Joab para ma quinyacana, huan ne seyoc pamit quimacac Itai, nopa geteo tacat. Huan Tanahuatijquet David quinilhui:

—Na nojquiya niyas nitatehuiti amo huaya.

³ Pero injuanti quinanquiliyayaj:

—¡Amo! Amo xiya, pampa tocualancaitacahua amo techchihuilese cuenta. Sinta ticholose o techmictise miyac ten tojuanti,

amo teno. Injuanti san mitztemohuaj ta para mitzmictise. Huan ta tahuel miyac mopati. Mopati quej 10 mil ten tojuanti. Más cuali ximocahua nica para techtitanilis tapalehuili sintu monequis.

⁴ Huan David quinilhui:

—Cualtitoc, nijchihuas cati amojuanti anquittaj para cuali.

Huan David ijcatoya campa caltemit ipan itepa nopa altepet huan nochí isoldados pejque quisaj ica pamit para tatehui-se. Sequij pamit quihiucayayaj 100 soldados huan sequij se mil.

⁵ Huan David quinilhui nopa tayacanani Joab, Abisai huan Itai:

—Sinta antechicnelíaj, xijmocuitahui-ca notelpoca Absalón.

Huan nochí nopa masehualme quicaj-que cati David quinnahuatijtoya nopa tayacanca soldados ten Absalón.

⁶ Huan yajque nochí isoldados David huan monamijque inihuaya nopa israelita-me cati isoldados Absalón ipan se cuatita-mit ipan tali Efraín. ⁷ Huan isoldados David quintanque nopa sequinoc israelita soldados ipan se hueyi tatehuilisti cati nelía chihahuac. Huan quinmictijque 20 mil ten injuanti. ⁸ Huan nochí nopa soldados cati mohetuiyayaj mosemantoyaj ipan nochí nopa hueyi cuatitamit cati ajsi campa hueli ipan nopa tali. Huan más miyaqui mijque pampa mococojque ipan nopa cuatitamit cati fiero, huan amo quej cati mijque ica teposti.

⁹ Huan Absalón yahuiyaya ipan se macho huan monamijqui inihuaya isoldados David. Huan quinejqui mochololtis, pero nopa macho calajqui itantita se ahua cuahuit cati quipiyayaya miyac imacuayo-hua. Huan nopona Absalón cuatacanqui itzon-teco huan mocajqui cuapilijtoc huej-capá huan imacho yajqui iseli. ¹⁰ Huan se ten isoldado David quitac huan quilhuito Joab:

—Na niquitztoc Absalón cuapilijtoc ipan se ahua cuahuit.

¹¹ Huan Joab quinanquili:

—Sinta tiquitac, ¿para ten amo tijmicti? Na nimitztaxtahuijtosquía ica 10 tomi ten plata, huan nimitzmacatosquía se motzinquechilpica para tielis se tayacanquet.

12 Huan nopa tacat quinanquili Joab:

—Masque techmacatosquía mil tomi ten plata, amo njmictisquía pampa nochí tojuanti tijcajque quema David mitzilhui ta, huan Abisai, huan Itai para ma tijmo-cuitahuica Absalón. **13** Huan sinta njmic-titosquía, Tanahuatijquet David nimantzi quimajtosquía para na njichijqui huan ta moseli techtatelhuijtostosquía.

14 Huajca Joab quijijo:

—Ayecmo nimochiyas más nica.

Huan Joab quicuitejqui eyi cuachoso huan yajqui campa cuatacantoya Absalón huan quicalaquili nochí eyi ipan iyolixco quema noja itztoya ipan nopa ahua cua-huit. **15** Huan teipa ajiscoj majtacti telpo-came cati quihiucayayaj iteposyolixtzajca Joab, huan inijuanti quimictijque Absa-lón.

16 Huan Joab tanahuati ma quipitzaca nopa tapitzali, huan quej nopa quinquetz-qui isoldados para ma ayecmo tatehuicaj para amo miquise sequinoc. **17** Huan qui-tanque itacayo Absalón huan quitalij-que ipan se hueyi ostot cati eltoya ipan no-pa cuatitamit. Huan ipani quimontonoj-que miyac tet. Huan nochí nopa israelita soldados cati ihuaya motalijtoyaj Absalón cholojtejque huan yajque ininchajchaj.

18 Huan quema noja itztoya Absalón, tanahuati ma quiquetzaca quej se teteyot cati hueyi ten ya campa nopa Tamayamit ten Tanahuatiani. Huan cati quichijchij-qui quipixqui se tajcuiloli ica itoca. Huan nochí quitocaxtalijque “iteteyo Absalón” huan hasta ama quej nopa quitocaxtiaj. Absalón quijito quichijqui ya nopa pampa amo quipixtoya se oquichpil para quihui-cas itoca quema miquis.

19 Huan Ahimaas, icone Sadoc, quiilhui Joab:

—Techcahuili ma nimatalo huan ni-quilhuiti David para TOTECO ya quimanahuijtoc ten icualancaitacahua.

20 Huan Joab quinanquili:

—¡Amo! Amo ta cati tijhuicas camanali ama, pero seyc tonali, quena. Ama mone-qui seyc quiyolmelahuati para mictoc icone nopa tanahuatijquet, pampa amo paquis ica nopa camanali.

21 Huan Joab quiilhui se tacat ten tali Etiopía:

—Xiquilhuiti David nochí ten panotoc.

Huan nopa tacat ten Etiopía mohuij-tzonqui iixpa Joab huan matalojejqui.

22 Huajca Ahimaas, icone Sadoc, sempa quiilhui:

—Techcahuili ma nimatali para nimo-talos iica ne tacat cati yahui.

Huan Joab quinanquili:

—¿Para ten tijnequi tiyas? Amo teno tijtanis ica cati tiquijtoti.

23 Huan Ahimaas tananquili:

—Masque amo teno njtanis, na njne-qui niyas.

Huajca Joab quiilhui:

—Huajca xiya.

Huan Ahimaas matalojejqui ipan se-yoc ojti campa tamayamit huan quitanqui nopa Etiopía tacat. **24** Huan David mose-huijtoya campa nopa caltemit ipan nopa tepamit cati más tatajco ipan ne altepet. Huan nopa tacat cati quimocuitahuiyaya nopa altepet itztoya tepanixco huan qui-itac se tacat cati matalojejhuialayaya iseli. **25** Huajca quiilhui Tanahuatijquet David. Huan David quiilhui:

—Sinta huala iseli, huelis quihualica se cuali camanali.

Huan quema monechcahuiyaya nopa matalojejquet, **26** nopa tacat cati quimocui-tahuiyaya altepet sempa quiitac para se-yoc matalojejhuialayaya huan nojquia-ya iseli, huajca quitzajtzili cati quimocuitahuiyaya caltemit ipan tepamit:

—Seyoc tacat matalojejhuialayaya iseli.

Huan Tanahuatijquet David quicajqui huan quijito:

—Huelis quihualica se cuali camanali.

27 Huan nopa tachixquet quijito:

—Cati tayacana matalohua senijqui Ahimaas, icone Sadoc.

Huan David quinanquili:

—Ahimaas yaya se cuali tacat huan temachtí quihualica cati cuali.

28 Huan Ahimaas ajisco campa itztoya Tanahuatijquet David huan mohuijtzonqui hasta talchi, huan quitajpalo huan quiilhui:

—Ma tijtascamatika TOTECO yaya cati moDios pampa mitzmanahuijtoc inimaco

mocualancaitacahua cati momatanantoyaj para mitztehuise.

29 Huan Tanahuatijquet David quiilhui Ahimaas:

—¿Quenicatza itztoc Absalón?

Huan ya quinanquili:

—Amo nijmati, pampa quema Joab techtitanqui niquininitac miyaqui motanana-yayaj, pero amo nijmatqui taya panotoc.

30 Huajca Tanahuatijquet David quiilhui:

—Ximochiya huan ximoquetza nopona.

31 Huan ipan nopa talojtzi ajisco nopa tacat ten tali Etiopía huan quiilhui Tanahuatijquet David:

—Nijhualica se cuali camanali. Toteco mitzmanahuijtoc ten nochí mocualancaitacahua.

32 Huan nopa tanahuatijquet quitatzin-toquili:

—¿Itztoc cuali notelpoca Absalón?

Huan nopa tacat quinanquili:

—Nelcuali elisquía sinta nochí mocualancaitacahua cati teipa motanana-mocahuase mictoque quej ama panoc ica Absalón.

33 Huan nopa tanahuatijquet tahuel moyoltequipacho huan tejcoc ipan icuarto itzompac nopa caltemit huan tahuel mochoquili. Huan quijtojityajqui: “Nocone Absalón, nocone Absalón. Nipaquisquía sinta na nimictosquía quej mopataca.”

Joab Quiyoltali David

19 Huan quiilhuitoj Joab para Tanahuatijquet David tahuel motequipachohuayaya huan quichoquiliyaya ico-ne, Absalón. **2** Huan nochí nopa tacame quimatque para David tahuel mocuesohuayaya, hujca inijuanti nojquiya tahuel mocuesoqque. **3** Huan nochí nopa soldados calajque ipan nopa altepet ixtacatzli huan ica pinahualisti quej mochololtijtosquíaj ipan se tatehuilisti. **4** Huan nopa tanahuatijquet moiitzajqui huan chocayaya chichuac huan quijtohuayaya: “Absalón nocone, Absalón nocone, nocone.”

5 Huan Joab hualajqui quiitaco Tanahuatijquet David huan quiilhui:

—Tanahuatijquet, ama tahuel techpinahualtijtoc nochí cati timitztequipanohuaj.

Tojuanti timitzmanahuiljitoque monemilis ten mocualancaitacahua huan tiquinmanahuijtoque mocone-hua, huan nochí mosihuajhuas huan moompaca sihuajhuas. Huan ama ta techchihua quej tijchijtosquíaj se hueyi tajtacoli. **6** Tiquinicnelia cati mitzcualancaitaj huan tojuanti cati timitzicneliaj, techcualancaita. Technextilijtoc ama para amo teno topati moixpa huan achi más ti-pactosquía sinta nochí techmictijtosquíaj huan san Absalón itztosquía. **7** Na nimitzilhuía monequi xiquisa huan xiquinyolchicha-hua mosoldados pampa sinta amo tijchi-huas, temachti amo mocahuas yon se ten inijuanti ni yohuali mohuaya. Huan sinta nochí mitzcajtehuase elis más fiero que nochí nopa tequipacholi cati mitzajsitihualajtoc ipan nochí monemilis hasta quema ticonetzi tieliyaya huan hasta ama.

8 Huajca David quisqui huan mosehui campa caltemit ten nopa altepet, huan nochí nopa soldados huan altepet ehuani quicajque para Tanahuatijquet David mosehuijtoya campa nopa caltemit. Huajca nimantzi hualajque nochí inijuanti quiitacoj huan David quinseli ica yejectzi. Huan nopa israelitame cati itztoyaj ihuaya Absalón cholojque hasta ininchajchaj.

David tacuepili altepet Jerusalén

9-10 Huan campa hueli ipan tali Israel ica huejcapa israelitame mocamanalhuiyayaj huan quijtohuayaya: “David techmanahuijtoc ten tocualancaitacahua nopa filisteos, pero quema tijtalijque Absalón quej totanahuatijca, ya quiquixti David. Pero ama mijqui Absalón ipan tatehuilisti. Huajca ¿para ten tijchiyaj? ¿Para ten amo tiquilhuíaj David para ma huala para sem- pa elis totanahuatijca?”

11 Huan quicajqui Tanahuatijquet David, huan huajca quititanqui se ma quinilhuiti ni camanali Sadoc huan Abiatar nopa totajtzitzi cati eliyayaj tayacanani ipan tali Judá ica tatzinta. Quinilhui: “Xiquincamanalhuica nopa huehue tacame ipan tali Judá huan xiquintatzintoquilica para ten amo technotztoque para ma nihualla para sempa nielis tanahuatijquet huan nitztos ipan nocaltanahuatil ipan tali Judá.

Pampa nochí israelitame cati itztoque ica huejcapa quinequij sempa ma nieli inintanahuatijca huan san amojuanti ayemo teño anquijtohuaj. ¹²Xiquinilhuica nopa tali Judá ehuani para inijuanti noicnihuahuan san se tonacayo huan toeso. Amo quinamiqui technotzase hasta teipa para ma nitacuepili ipan nochaj ipan inintal. ¹³Nojquiya xiquilhuica Amasa cati eliyaya tayacanquet ten isoldados Absalón para njtalís para quinyacanas nosoldados huan amo Joab, pampa Amasa nomachcone. Xiquilhuica ma Toteco Dios techatzaculti sintá amo njchihuas cati niquilhuijtoc.” Quej nopa quijito David.

¹⁴Huan quema Amasa cati achtohuiya quinyacanqui isoldados Absalón quicajqui para quichihuas David itayacanca ten nochí isoldados, huajca pejqui quinyoltalía nochí israelitame ipan tali Judá para ma quinotzaca David. Huan ica san se iniyolo quintitanqui ma quihuitij David huan nochí cati ihuaya itztoyaj ma tacuepilica ipan Jerusalén. ¹⁵Huajca Tanahuatijquet David quistejqui ica imasehualhua para tacuepilise Jerusalén, huan quema ajsitoj campa quiixcotanase hueyat Jordán, nesiyaya quej nochí tali Judá ehuani san sejco hualajtoyaj tali Gilgal para quinamiquise David huan quej nopa san sejco panose ipan hueyat.

¹⁶Huan Simeí, nopa tacat cati achtohuiya quisqui ipan altepet Bahurim huan quitelchijqui David ama moisihulti huan quinamiquico. Huan hualajqui inihuaya nochí nopa israelitame ten tali Judá. Huan Simeí cati eliyaya icona Gera huan se iixhui Benjamín, ¹⁷quinhualicayaya se mil tacame cati nojquiya iixhuihua Benjamín. Huan nojquiya ihuaya Simeí hualayaya Siba cati achtohuiya elqui itequipanojca Tanahuatijquet Saúl huan quinpixqui ¹⁵iconehua huan ²⁰itequipanojcahuia. Huan nochí inijuanti ajsitoj achtohui ipan hueyat Jordán, ¹⁸huan tequitique chicahuac para quinpanoltijque nochí ichaj ehuani David ipan hueyat Jordán. Huan miyac hueltas quiixcotonque hueyat Jordán para

Tanahuatijquet David ma quita quenictazta inijuanti cuali quitequipanohuayayaj. Huan quema Tanahuatijquet David quiixcotonasnequiyaya nopa hueyat, Simeí mohujtonqui talchi iixpa, ¹⁹huan quiilhui:

—Amo techtajtacolti por nopa fiero tamanti cati njchijqui quema tiquisayaya Jerusalén. Techtaojpolhui huan ayecmo xiquelnamiqui nochí cati nimitzchihuili. ²⁰Nijmati para tahuel hueyi notajtacol ica ta, huan yeca ama nihualajqui achtohui ten nochí Israel ehuani^a para nimitseli qui.

²¹Huan Abisai huan iicni cati eliyaya iconehua Sarvia quiilhuijque Tanahuatijquet David:

—¿Amo tijnequi ma tijmictica Simeí pampa mitzelchijqui ta cati TOTECO mitz-tapejenijtoc?

²²Huan David quinnanquili:

—¡Amo! Amo quinamiqui para aniconehua Sarvia antechilhuiise ma njchihua cati fiero. ¿Para ten monequi miquis se ipan total Israel? Na nitanahuatijquet ipan Israel huan niquijtohua amo aquí tijmictise.

²³Huan teipa David quitachili Simeí huan quiilhui:

—Amo ximomajmati, amo timiquis.

²⁴Huan nojquiya Mefi Boset quinamiquico Tanahuatijquet David, ya cati iixhui mijcatzi Saúl. Huan Mefi Boset amo moicxipajpactoya, yon amo maltijtoya, yon amo motentzonxintoya, yon amo quipatatoya iyoyo hasta quema David quisqui, huan hasta ama quema ajsitihualayaya ica paquilisti ipan Jerusalén. ²⁵Huajca David quiilhui:

—Mefi Boset, ¿para ten amo tiyajqui nohuaya?

²⁶Huan Mefi Boset quinanquili:

—Ay notanahuatijca, Siba notequipanojca nechcajcyajqui. Na nijnahuati ma quisiyajti se burro huan ma techhualiquili para ipan nitejcos para niyas mohuaya, pero nechcajcyajqui huan nechcajtejqui noselti. Tijmati para nimetzcuacho ipan nochí ome nometz. ²⁷Huan ama techista-cahuijtoc moixpa pampa mitzilhuijtoc pa-

^a19:20 O iixhuihua José.

ra amo nijnejqui niyas mohuaya, pero amo cana. Pero ta titanahuatijquet, tijmati nochí quej tielisquía tiilhuicac ejca Toteco Dios. Huajca xijchihua cati tiquita para quinamiqui ica tojuanti. ²⁸Pampa tojuanti cati tiichaj ehuani Saúl san quinamiquiyaya techmictijtosquía. Pero tecnicnelijtoc huan hasta technotzqui para ma niitzo mochaj huan ma nitacua mohuaya mojmosta. Amo teno quinamiqui nimitztajtanis más.

²⁹Huan David quinanquili:

—Amo monequi ticamanaltis más. Ma eli quej niquijtojtoc para Siba huan ta amotajcoxelhuilise nopa tali.

³⁰Huan Mefi Boset quinanquili:

—Más cuali nochí ma mocuili ya. Na nipaqui miyac san pampa titacuepilijtoc ica cuali ipan mocaltanahuatil.

³¹Huan nojquia nopa huehue tacat Barzilai hualajqui ten altepet Rogelim ipan tali Galaad huan quipanoc hueyat Jordán hasta seyoc nali ihuaya Tanahuatijquet David. ³²Huan Barzilai ya eliyaya huehuentzi. Quipiyayaya 80 xihuit. Yaya quimacayaya David huan imasehualhua nochí ten ica panose quema mocahuayayaj ipan altepet Mahanaim pampa nelia quipiyayaya tomi. ³³Huan Tanahuatijquet David quiilhui:

—Nijnequi xiya nohuaya ipan altepet Jerusalén huan nimitzmocuitahuis.

³⁴Huan Barzilai quinanquili:

—Na ayecmo nihuejcahus para niitztos. ¿Para ten niyas Jerusalén san para nimitztequimacati? ³⁵Ama ya nijpiya 80 xihuit. Ayecmo hueli nijmati sinta ajhuiyac cati nijcua huan cati niqui. Ayecmo hueli niquincaqui cuali nopa tacame huan sihuame cati huicaj. Huajca ¿para ten nimitzohuijmacati? ³⁶Na nihualajtoc san para nimitzmacahuaqui nica campa hueyat Jordán. Huajca ¿para ten techtencahuilía ni hueyi tamanti? ³⁷San techcahuili nitacuepilis ipan noaltepe huan nim quis nepa campa notatahua mijque, huan nimitzalpachos campa inijuanti mitalpachojque. Pero nica itztoc nocone Quimam. Ma yahui mohuaya huan xijchihua cati tiquita para cuali.

³⁸Huan Tanahuatijquet David quiilhui: —Cualtitoc, ma yahui nohuaya Qui-mam huan nijchihuilis cati nimitzchihui-lijtosquía ta. Huan nochí cati tijnequi techtajtanis para nimitzchihuilis, nijchi-huis.

³⁹Huan quema David huan nochí ima-sehualhua tamipanoque ipan hueyat Jordán, David quitzoponi Barzilai huan qui-tiochijqui. Huan Barzilai yajqui ichaj.

⁴⁰Huan David nejnentiyajqui hasta alte-pet Gilgal. Huan ihuaya yajqui Quimam huan nochí nopa tali Judá ehuani huan nechca tajco nopa masehualme ten tali Israel. ⁴¹Huan nochí nopa israelita tacame cati hualajque ten tali Israel ica huejcapa cuanque huan yajque quiitatoj Tanahuatijquet David huan quiilhuijque:

—¿Para ten san nopa israelita tacame ten tali Judá ica tatzinta quinpanoltijque nochí mochan ehuani huan nochí amota-mantzitzi ipan hueyat Jordán?

⁴²Huan nochí nopa tacame ten tali Judá tananquilijque:

—Tojuanti tijchijque nochí pampa ni tanahuatijquet huala ipan san se tohueyi familia ica tojuanti. Yaya iixhui tohuejca-pan tata Judá quej tojuanti. ¿Para ten an-cualanij ica ya ni? Amo tijtajtanijtoque ma techtaxtahui, yon amo techtamacac.

⁴³Huan nopa israelitame ten tali Israel ica huejcapa tananquilijque:

—Tojuanti achi más toaxca Tanahuatij-quet David huan amo amojuanti, pampa tijpiyaj majtacti huejhueyi familias ipan total, huajca majtacti huelta más toaxca. Huan achtohui tojuanti tijnotzque para ma tacuepili ipan ichaj huan amo amojuanti. ¿Para ten techcualancaitztoc huan techiyocacajtoc?

Huan quej nopa monajnanquilijque, pero nopa israelitame cati tali Judá ehuani camanaltiyayaj más fiero que nopa tali Israel ehuani.

Seba mosisini ica David

20 Huan ipan nopa tonal itztoya nopo-na se tacat cati eliyaya fiero inemili-s cati itoca Seba cati eliyaya icones Bici-ri ipan nopa hueyi familia Benjamín. Huan

yaya quipitzqui tapitzali huan quinilhui nopa israelitame ten tali Israel:

“AnIsrael ehuaní, xiycá amochajchaj. Ni David cati icone Isaí amo totanahuaticca.

Amo teno tijselise nica.

Ma tiyaca tochajchaj ipan total.”

²Huan ipan nopa tonali nochí israelitame ten tali Israel ica huejcapa quicajtejque David huan quitoquilique Seba, icone Bicri. Pero nopa israelitame ten tali Judá ica tatzinta mocajque ihuaya, huan nejnenque ihuaya ten nopa hueyat Jordán hasta Jerusalén.

³Huan David ajsito ipan icaltanahuatil, huan tanahuati ma quinpanoltica ipan seyoc cali nopa majtacti iompaca sihuajhua cati quincajtoya para quimocuitahuise icaltanahuatil. Huan David quintali tetequipanohuani para quinmocuitahuise huan mojmosta quinmacayaya inintacualis, pero ayecmo cochqui inihuaya. Nopona mocajque tzactoque iyoca ten nopa tanahuatijquet quej cahual toahuime hasta quema mijque.

Joab quimicti Amasa

⁴Huan Tanahuatijquet David quinahuati Amasa cati achtohui elqui tayacanquet ten isoldados Absalón huan quilhui:

—Xiquinnatzati nochí nopa soldados ten tali Judá para ipan eyi tonati monequi ma mosentilica huan ma monextica nica noixpa. Huan ta nojquia monequi timonextis.

⁵Huajca Amasa yajqui para quinsentilis nochí nopa soldados ten tali Judá, pero amo huelqui tacuepili ipan nopa tonal quema mocajtoya para tacuepilis. ⁶Huan Tanahuatijquet David quiilhui Abisai:

—Xiquinsentili nochí nosoldados cati nica mocahuaj huan xijtoquili Seba, pampa huelis techchihuilis más fiero que Absalón. Huan sintia calaquís ipan se altepet tzactoc para motatis, elis ohui para tijpantise.

⁷Huajca Joab ica isoldados cati achi más tapejpenilme huan cati quimocuitahuiyaj nopa tanahuatijquet quisque Jerusalén ica Abisai para quitemotij Seba.

⁸Huan quema injuanti monechcahuiya-

yaj campa eltoya se hueyi tet ipan altepet Gabaón, monamijque ihuaya Amasa cati quinsentiliyaya isoldados David quej quiilhui. Huan Joab quihuicayaya iyoyo cati nochipa quitequihuiyaya ipan tatehuilisti huan motzinquechilpitoya ica se cinturón cati quipiyayaya campa quiajocuiyaya imacheta ipan icuetax cati amo ohuijtí para quiquitxtía. Huan quema monechcahui campa Amasa huan mohuijzonqui, huetzqui imacheta huan quitilanqui. ⁹Huan Joab quiilhui Amasa:

—¿Tiitztoc cuali, noicni?

Huan quiitzquili intentzo Amasa ica inejmat para quitzoponisquía.

¹⁰Huan Amasa amo moilhui taya quichihuilisquía Joab. Huan Joab quicalaqui li ijítico nopa macheta huan quicuetaxcolquixti. Huan nimantzi mijqui Amasa huan nopona mocajqui huetztoc itacayo. Huan Joab huan iicni, Abisai, nimantzi quistejque para quitemotij Seba. ¹¹Teipa se isoldado Joab moquetzqui campa eltoya itacayo Amasa huan quijito:

—Cati itztoc ihuaya David ma quitoquilica Joab para quitemotij Seba.

¹²Huan Amasa espoltic huetztoya tajco ojti huan nochí cati panoyayaj moquetzayaj huan quitachiliyaj. Huan nopa soldado quittac para nochí moquetzayayaj nopona, huajca quiijcueni itacayo huan quixtzajqui ica se yoyomit. ¹³Huan teipa nochí quitoquilique Joab.

¹⁴Huan Seba panoc ipan nochí nopa altepeteme ipan tali Israel. Yajqui ipan altepet Abel Bet Maaca hasta ipan nochí inintialifamilia Barim. Huan miyac mosentilique ihuaya huan quitoquilique. ¹⁵Huan ajsicoj Joab huan nochí isoldados David hasta altepet Abel Bet Maaca, huan quiyahualojque nopa altepet huan quimontonojque tet para huelis panose iixco nopa achtohui tepamit. Teipa pejque quisosolohuaj nopa seyoc tepamit cati más tatajco ipan altepet. ¹⁶Huan se sihuat cati talnamiqui cuat�ajtic ipan nopa altepet huan quijito:

—Techcaquica, xiquilhuica Joab para nijnequi nijcamanalhuis.

¹⁷Huan quema Joab monechcahui, nopa sihuat quitzintoquili:

—¿Ta tiJoab?

Huan Joab quinanquili:

—Quena.

Huan ya quiilhui:

—Xijtacaquili cati nimotequipanoja nimitzilhuis.

Huan Joab quiijto:

—Cualtitoc.

18 Huajca nopa sihuat quiijto:

—Huecjajquiya nochí momatque quiijtohuj: ‘Cati quinequi quimatis se tenijqui ma tajtani consejo ipan altepet Abel’, huan quej nopa mosencahuayaya nochí cualanti, pampa toaltepe quinpiyayaya masehualme cati talnamiquij. **19** Na niitztoc inihuaya cati quinequij para ma onca tatepanitacayot para totanahuatijca huan para tiitzose ica cuali. Huan ama ta tijnequi tjsosolos toaltepe cati ya tahuel miyac xihuit quipiya. ¿Cuali para tjsosolos cati iaxca TOTECO?

20 Huan Joab quinanquili nopa sihuat:

—Amo nijnequi nitasolos. **21** Pero se tacat cati itoca Seba, icono Bicri huan cati huala ipan nopa cuatitamit ipan tali Efraín motanantoc para quitzontamiltis itanahuatilis Tanahuatijquet David huan yaya calactoc ipan ni altepet. Techmactili huan tijcahuase ni altepet.

Huan nopa sihuat quinanquili Joab:

—Cualtitoc, timitzmajcahuilise itzon tecu ten ni tepamit.

22 Huan nopa sihuat ica miyac talnami quilisti yajqui huan quincamanalhui nochí nopa altepet ehuani. Huan inijuanti quitzontejque itzon tecu Seba, icono Bicri, huan quimajcahuilique Joab. Huan Joab quipitzqui nopa tapitzali para ayecmo ma tatehuica isoldados. Huan quicajque nopa altepet, huan nochí tacuepilique ininchajchaj. Huan Joab yajqui ipan altepet Jerusalén campa itztoyá Tanahuatijquet David.

Itequipanojcahua David

(2 S. 8:15-18; 1 Cr. 18:14-17)

23 Huan Joab quinnahuatiyaya nochí israelita soldados. Huan Benaía cati elqui icono Joiada quinnahuatiyaya nopa soldados cati más tapejpenilme cati quimocui-

tahuiayaj nopa tanahuatijquet huan molalohuayayaj ica camanalí. **24** Huan Adoram quinnahuatiyaya nopa tacame cati monequiyaya tequitise se quesqui tonati san tapic para quitaxtahuise impuestos nopa tanahuatijquet. Huan Josafat, icono Ahilud, eliyaya cati quiijcuilo sesen tamanti cati panoc ipan itanahuatilis David mojmosta. **25** Huan Seba elqui itajcuilojca, huan Sadoc huan Abiatar eliyaya totajtzitzti. **26** Huan Ira, ten pilaltepetzi Jair, nojquiya eliyaya totajtzi, pero mocajqui san ica David.

Eyi xihuit ten mayanti

21 Ipan nopa tonali quema David eliya yaya tanahuatijquet oncac se hueyi mayanti, huan quej nopa elqui eyi xihuit. Huan David motatajti ica TOTECO huan quitatzintoquili: “¿Ajquiya itajtacol para hualajtoc nopa mayanti?”

Huan TOTECO quilhui: “Hualajtoc por itajtacol Saúl huan ichaj ehuani cati quimpacti temictíaj, huan yeca quinmictijque nopa gabaonita masehualme.”

2 Huajca David quinnotzqui nopa gabaonitame cati noja itztoyaj, huan camanaltic inihuaya. (Nopa gabaonitame amo eliyayaj israelitame. Inijuanti eliyayaj cati noja mocajque ten nopa amorreos. Huecjajquiya nopa israelitame quichijtoyaj se amatajcuiloli inihuaya para amo quinmictisquíaj. Pero Saúl, quena, quinmieti se- quij pampa quincualancaitayaya pampa amo israelitame. Amo ejque ipan tali Israel, yon ipan tali Judá.) **3** Huajca David quintatzintoquili nopa gabaonitame:

—¿Taya huelis nimechchihuilis para quentzi nimechcuepilis por nopa cati fiero amechchihuili Saúl? ¿Taya nimechmacas para antechapojpolhuise tiisraelitame huan anquitajtanise TOTECO ma techtiochihua sempá?

4 Huajca nopa gabaonitame quinanquili quej David:

—Amo tijnequij tomi, yon oro, yon plata, pampa Saúl amo techtahuiquilá ya no-pa. Yon amo quinamiqui tipehuase tiquinmictise israelitame por itajtacol.

Huajca David quinilhui:

—Huajca ¿techilhuica taya anquijitaj cuali ma njichihua huan ya nopa njichihuas?

5Huan injuanti quinanquilijke:

—Nopa mijcatzi Tanahuatijquet Saúl eliyaya nopa tacat cati quinequiyaya tech-tamimictis para yon se ten tojuanti amo mocajtosquía tiyoltoque ipan nochí tali Israel. **6**Huajca techmaca chicome iixhuihua ya. Huan tiquincuapilose miyacapa iixpa TOTECO ipan Gabaa cati eliyaya ial-tepe Saúl, yaya cati TOTECO achtohui qui-tapejpeni para elis tanahuatijquet.

Huajca David quinilhui:

—Cualtitoc, nimechmacas.

7Pero Tanahuatijquet David amo quinmacac Mefi Boset, icona nopa mijcatzi Jonatán huan iixhui nopa mijcatzi Saúl, pampa ica mocajtoya Jonatán iixpa TOTECO para quinmocuitahuis iconehua. **8**Huajca David quinitzqui ome tacame cati eliyayaj iixhuihua Saúl, se itoca Armoni huan seyoc cati nojquiya itoca Mefi Boset. Pero ininana eliyaya Rizpa, iichpoca Aja, se iompaca sihua Saúl. Huan David nojquiya quinitzqui seyoc macuilit iixhuihua Saúl cati eliyayaj itelpocahua iichpoca Saúl cati itoca Mical, huan inintata elqui Adriel, cati eliyaya icona Barzilai nopa meholatita tacat. **9**Huan David nochí quinmactili nopa gabaonitame, huan injuanti quincuapilojque ipan se tepet iixpa TOTECO. Huan nochí chicome mijque ica sempa quema masehualme sanoc pejtoyaj quipixcaj cebada.

10Huan Rizpa, iichpoca Aja, quicuito se yoyomit cati fiero huan quipatajqui ipan se hueyi tet nechca campa quincuapilojtoyaj itelpocahua huan nopona mocajqui. Huan amo quincahuili totome ma monechcahuica tonaya campa inintacayo-hua, yon tapiyalme ma monechcahuica ica tayohua. Huan quej nopa quichijqui ten quema pejqui pixcaj huan hasta quemá pejqui taquiyahui huan nochí quimachilijke para nopa tali ayecmo quihuicaya tajtacoli iixpa TOTECO.

11Huan quiyolmelajque David para Rizpa, cati eltoya se iompaca sihua Saúl, quinmocuitahuiyaya inintacayo itelpoca-

hua, **12-14** huajca David tanahuati ma quintalpachoca ipan altepet Zela ipan tali Benjamín campa quitalpachojoque Cis, itata Saúl. Huan nojquiya David tanahuati ma quicuitij iniomiyohua Saúl huan Jonatán. Nopa tacame ipan altepet Jabes Galad-ad quiichtejque iniomiyohua Saúl huan Jonatán ipan tianquis ipan altepet Bet Sán campa nopa filisteos quincuapilojtoyaj quema quinmictijke ipan tatehuilisti ne-pa Gilboa. Huan David tanahuati para ma quihuicaca iniomiyohua Saúl huan Jonatán huan quitalpachose inihuaya inixhuihua. Huan nochí mochijqui quej Tanahuatijquet David tanahuatijtoya. Huan sempa pejqui quinnanquilía TOTECO quema nopa israelitame quitajtaniyaj se tenijqui huan tanqui nopa mayanti.

Tatehuilisti ica nopa filisteos

15Huan se tonali quema nopa filisteos sempa quisque para quintehuise israelita-me, yajqui David inihuaya nochí isoldados. Huan quema quintehuiyaj, David nelía siyajqui. **16**Huan ajsico se filisteo tacat huejcapantic cati itoca eliyaya Isbi Benob. Eliyaya se inixhui nopa masehualme cati tahuel huejcapantique. Huan quihuacilayaya icuachoso cati quipiyayaya 30 kilos ietica huan imacheta yancuic cati on-cac tatentili. Huan monechcahui para qui-mictis David. **17**Huan Abisai, itelpoca Sarvia, quipalehuico David huan quimicti nopa filisteo. Huan teipa nochí isoldados Da-víd quiilhuijque ma ayecmo quisas inihuaya ipan se tatehuilisti. Quiijtojque sinta ya miquis, elis quej sehuis nopa taahuili ipan tali Israel. Huajca David ayecmo yajqui ipan tatehuilisti.

Quintehuijque nopa huejcapantique

tacame

(1 Cr. 20:4-8)

18Huan teipa quema panoc tonali, sempa oncac seyoc tatehuilisti ica nopa filisteos ipan tali Gob. Huan Sibecai, se husatita tacat, quimicti Saf cati nojquiya huejcapantic pampa elqui se inixhui injuanti cati tahuel huejcapantique. **19**Huan nojquiya seyoc huelta oncac seyoc tate-

huilisti ipan Gob ica nopa filisteos huan Elhanán, icono Jaare Oregim, ten altepet Belén quimicti seyoc Goliat ten altepet Gat cati nojquiya huejcapantic huan qui huicayaya icuachoso cati tomahuac.

20 Huan oncac seyoc tatehuilisti ipan altepet Gat huan itztoya nopona se tacat cati nelía huejcapantic cati quipiyayaya 12 imacpilhua huan 12 ixocpilhua, chiuase ipan sese imax, huan chicuase ipan sese iicxi. Huan ya nojquiya eliyaya icono se masehuali cati tahuel hueyi. **21** Huan quinhuetzquili israelitame, huan huajca se tacat itoca Jonatán quimicti. Yaya eliya yaya icono Simea, iicni David. **22** Huan nochí ni nahui huejhueyi tacame eliyayaj iniixhuihua nopa huejcapantique masehualme ipan altepet Gat. Huan nochí mijque inimaco David huan isoldados.

Nopa huicat cati David quiijcuilo
(Salmo 18)

22 Huan ya ni eltoc nopa huicat cati David huicac para TOTECO pampa quinmanahuijtoya ten nochí icualancaitacahua huan ten Saúl. **2** Quiijo:

“TOTECO, ipan ta nimotatía.

Ta cati techmanahúa.

Eltoc quej nielisquía calijtic ipan se cali ica tepamit cati tilahuac campa amo teno hueli nechajsis.

Ta tinotemaquixtjica.

3 NoTeco Dios, ta techyahualohua para amo huelis techajsise nocualancaitacahua.

San ipan ta nimotemachis.

Ta cati techyahualohua para techmanahuía ten mosisinijca tacame.

NoTeco Dios, ipan ta njimati nitemachti.

Tinotemaquixtjica.

Techmanahuía ten cati techmictisquía.

4 Nijnotzas, TOTECO, cati quinamiqui tijhueyichihuase.

Huan yaya techmaquixtis ten nocualancaitacahua.

5 Quema nochí techyahualtzacuayayaj para techmictise, huan njimatqui techtanisnequiyaya

cati amo cuali, ica nochí ichicaluis, nimitztzajtzili.

6 Quema njimatiyaya nimquisquía huan techtilanayaya campa mijcatzitzi,

huan nimoixnamiquiyaya ica miquilisti,

7 huajca ipan notaohuijcayo njinojnotzqui TOTECO.

Quena, njitzajtzili noTeco Dios ma techpalehui.

Huan yaya techtacaquili hasta nepa ipan ilhuicac.

Quena, quitacaquili cati niquilhui, huan techpalehui.

8 Huajca chicahuac mojmolini tali, huan nojquiya molini ilhuicacti campa motatzquiljtoc.

Nochi mohuihuioxque pampa Toteco Dios cuanqui ica nocualancaitacahua.

9 Elqui quej pocti quisayaya ipan iyacatzol.

Huan icamaco quisayaya tilelemecti cati tetzontamiltiyaya.

Quena, elqui quej lemeniyaya miyac ti cuahuit, pampa tahuel cuanlantoc.

10 Huan TOTECO quiechcapano ilhuicacti huan hualtemoc para techpalehuis.

Nejnentihualajqui ipan mixti cati nelayahui.

11 Elqui quej TOTECO tejcoc ipan ieltapal se querubín ilhuicac ejquet huan patantihualajqui ajacatipa.

12 Yaya motzajqui ica tzintayohuilot, huan at quiyahualo para amo aqui quiitasquía.

13 Cahuaniyaya itatanex TOTECO huan elqui quej tapetaniyaya iixpa. Huan itatanex lemeniyaya quej ticuahuit.

14 Tatomonqui nelía chicahuac ten ilhuizac huan ajsic campa hueli, pampa TOTECO Cati Más Hueyi camanaltic.

15 Quimajcajqui cuataminti huan nocualancaitacahua cholojque campa hueli.

- Tahuel tapetanalti huan quitamisoso-lo.
- 16** Quema yaya tailpitzqui ica cualanti, quixejxelo nopa hueyi at cati tahuel huejcata, huan nopa ojme cati eltoc atatzinta monexti.
- Huan nesqui tanemijya noch i tzinpe-huhtil ni taltipacti, pampa TOTECO teajhuac chicahuac.
- 17** TOTECO momaxitajqui ten ilhuicac huan techitzqui.
- Techmaquixti quema nimisahuiyaya ipan miyac at.
- 18** Techmanahui ten nocualancaitacahua cati más tetique.
- Techmaquixti ten inijuanti cati tech-cualancaitayabaj, huan cati techpanoyayaj ica ininchicahualis.
- 19** Inijuanti nechtehujque quema nech-ajsitoya se hueyi tequipacholi. Pero TOTECO nechpalehui huan nech-tali campa temachti.
- 20** Techhuicac campa amo mahuilib. Techmaquixti pampa techicnelia.
- 21** TOTECO techtaxtahuijtoc pampa nij-chihua cati xitahuac iixpa.
- Techpalehui pampa quiitac para amo teno njchijtoya.
- 22** Quena, nijtoquilijtoc iojhui TOTECO, huan amo njcajtoc. Amo njcajejtoc noTeco Dios para nij-toquilib cati amo cuali.
- 23** Niquixmati itanahuatilhua, huan amo quema nimohuejcatalijtoc ten cati quiijtohua.
- 24** Ninejnentoc xitahuac iixpa, huan nimomocuitahuijtoc para amo nitajtacolchihuas.
- 25** Yeca TOTECO techtaxtahuijtoc, pampa njchijtoc cati xitahuac. Techtiochijtoc pampa techitztoc para nitapajpacti iixpa.
- 26** Ta, TOTECO tiquintasojta cati tetaso-jtaj. Tiquinchihuila nel xitahuac cati nej-nemi xitahuac.
- 27** Timonextia titapajpactic ica cati ta-pajpactic.
- Pero timonextia tahuel tichicahuac ica inijuanti cati fiero inintalna-miquilis.
- 28** Ta tiquinmaquixtia cati mokesohuaj, pero tiquintachilí masehualme cati mo-hueyimatij, huan tiquinicnotalía.
- 29** TOTECO, tinotaahuil.
- Techtaahuilá ipan tzintayohuilot.
- 30** Ica mochicahualis Toteco Dios huelis niquintanis miyac soldados cati nocualancaitacahua.
- Huelis nihuitonis para nipanos iixco nopa tepamit ipan inialtepe.
- 31** Xitahuac noch iojhui Toteco Dios. Nochipa quisa melahuac cati quiijt-hua icamanal TOTECO.
- Yaya quinmanahuía noch i cati mote-machíaj ipan ya.
- 32** Amo aqui seyoc Dios, san yaya TOTECO.
- Amo aqui seyoc quipiya tetili para techmanahuis quej Toteco Dios.
- 33** Yaya Toteco Dios cati techchicahualis-maca.
- Quichihua temachti noojhui.
- 34** TOTECO quichihua noicxihua ma elica sonectzitz.
- Quinchihua temachti quej iniicxi chi-vojme cati matalohuaj campa tepeixco.
- Techtalijtoc huejcapa huan niya ica temachili.
- 35** TOTECO techmaca noyajatil para huelis nitatehuis.
- Nechfuerzajmaca hasta ica nomax huelis njcuilpachos se tepos huitoli cati tetic cati quichijto-que ica bronze.
- 36** Ta techmanahuía quej se tepesti cati techyahualohua.
- Quena, techmaquixtia huan ica mota-icnelil techhueyichijtoc.
- 37** Noojhui tijchijtoc patahuac para amo niohuijtis, huan para amo nimopeyahuas quema ninejnemis.
- 38** Niquintoquili nocualancaitacahua, huan niquintzontamilti.
- Amo nitacuepili hasta noch iquin-micti.

- 39** Niquintzontamilti nochí para amo
aqui huelis sempa motananas.
Injuanti huetzque noicxita.
- 40** Ta techmacac tetili para huelis nitate-
huis.
Ta techtanilijtoc nocualancaitacahua
huan mocajtoque noicxita.
- 41** Huan ta tijchijqui para nochí nocua-
lancaitacahua ma choloca noix-
pa.
Niquintzontamiltijtoc nochí cati tech-
cualancaitayabaj.
- 42** Injuanti tatzajtzilijque para acajya
ma quimaquixtiqui,
pero amo aqui quinpalehui.
Hasta nojquia quitajtanijque TOTECO
ma quinpalehui,
pero amo quintacaquili.
- 43** Huajca na niquinchijqui quej taltepochi.
Niquintaijyohuilty huan ininpani ni-
moquejquetzqui quej soquit
ipan ojti.
- 44** Techmanahujtoc ten nopa fiero tac-
ame cati mopantíaj ipan noalte-
pe.
Techtalijtoc para ica temachili nielis
niinintanahuatijca miyac talme.
Ama techtequipanohuaj masehualme
cati ehuani ipan talme cati ach-
tohuiya amo niquinixmatiyaya.
- 45** Huan cati ehuani ipan sequinoc talme
huihuipicaj noixpa.
Techneltoquilíaj quema quicaquij ten
nochicahualis.
- 46** Sequinoc tali ehuani momajmatíaj,
huan quisaj ten campa motatijtoque,
huihuipacatihualhui noixpa.
- 47** TOTECO itztoc.
Ma tijpaquilismacaca yaya ipan cati
nimotatíaj.
Ma tijhueyichihuaca Toteco Dios,
pampa yaya cati techmaquixtia.
- 48** Toteco Dios quincepilía nochí nocua-
lancaitacahua.
Quintantoc nochí altepeme huan
quinchijtoc ma techtepanitaca.
- 49** Quena, TOTECO techmanahujtoc ten
nocualancaitacahua.
Techtalijtoc más huejcapa que nopa
tacame cati techajsisnequiyayaj.

- Techmaquixtijtoc ten nopa tacame ca-
ti mosisiníaj ica na.
- 50** Yeca nimitztascamati, TOTECO.
Nimitzhueytalis iniiexpa cati ehuani
ipan nochí talme.
Nimitzhuicatis ni huicat para nimitz-
paquilismacas.
- 51** TOTECO, ta techmanahujtoc huan
techtalijtoc nimotanahuatijca.
Techtasojtacat na, niDavid, cati ta
techtapejpenijtoc.
Ta tiquintasojtas nochí noteipan ix-
huihua para nochipa.”
- Itamiya camanal David**
- 23** Ya ni itamiya camanal David:
“Na niDavid, niicone Isaí, nica-
manalti.
Na cati Toteco Dios techhueytalijtoc.
Na cati techtapejpeni huan techchij-
qui nitanahuatijquet,
Toteco Dios, yaya cati iDios tohuejec-
pan tata Jacob.
Na cati Toteco techmacac miyac hui-
cat yejyectzitz para tiisraelita-
me hueli ica tijpaquilismacase.
- 2** Itonal TOTECO quitequihuía nocamac
para ma niquijto icamanal.
Toteco quichijqui para icamanal ma
quisa nocamaco.
- 3** Yaya Toteco toDios tiisraelitame nech-
camanalhujtoc.
Yaya cati ipan tiisraelitame timochiyaj
techilhui:
‘Hualas se cati tanahuatis xitahuac
campa masehualme.
Yaya techimacasis huan tanahuatis
quej monequi.
- 4** Yaya elis quej nopa taahuili cati quisa
cualca.
Elis quej quema taahuitihuala tonati
yejyectzi ica ijnaloc quema amo
onca yon quentzi mixti.
Yaya temacas paquilsti quej techmaca
paquili para chamanis sacat
ipan tali quema yancuic taqui-
yajtoc.’
- 5** Huan Toteco Dios quintapejpenijtoc
nochaj ehuani cati teipa tacajti-
yase para tanahuatise iixpa.

Huan nohuaya quichijtoc se camanal sencahuali para nochipa cati quiipiya nochi cati mocajtoc ica na para techchihuilis teipa.

Nopa camanal sencahuali cati nohuaya quichijqui quiipiya nochi tahuatili cati monequi huan elis temachti para nochipa.

Temachti yaya quitamichijiyas sesen tamanti cati techilhuijtoc qui-chihuas ica noixhuihua huan nochi quisas cuali para na.

Masque noja polihui para panos, nijmati para se tonali panos nochi cati nijnequisquia ma onca pampa quej nopa noca mocajtoc.

6 Pero nochi cati amo quitepanitaj Totecó itztose quej huitzti cati tijcuatepehuaj huejca.

Amo aqui quinequis quinitzquis ica imax.

7 Huan sinta acajya quitzontequisnequis nopa huitzti, monequi momapiquis huan quihiucas itepos cuatopil para amo quimachajcos.

Monequi quintatis ipan tit huan sensisa quitamiltis.”

Inintoca isoldados David cati más motemacayayaj.

(1 Cr. 11:10-47)

8 Ya ni inintoca nopa eyi tacame cati más tetique huan más motemacayayaj ten nochi isoldados David. Yaya cati más hueyi ten nopa eyi itoca Joseb Basebet cati ten Tacmon cati quinyclanqui nopa eyi. Ica icuatamin quinmicti 800 tacame ipan se tatehuilisti.

9 Nopa ompa hueyi soldado itoca Eleazar cati elqui icone Dodo huan iixhui Ahohi. Eleazar monexti para nelía motemacayaya quema san ni eyi tacame huan David mocajque para quintehuisse nopa filisteos. Huan nochi sequinoc israelita soldados cholojque. **10** Huan Eleazar pejqui quinmictia filisteos ipan nopa tonali, huan quinmictijtijayqui hasta tahuel siyajqui. Huan macuatiyaya hasta amo hueliyaya quimajcahua imacheta. Huan Toteco nelía

quipalehui David huan nopa eyi soldados, huan yeca tahuel tatanque ipan nopa tonali. Huan teipa nopa sequinoc israelita me cati cholojtejtoyaj tacuepilijque san para quinquixtilise nopa filisteo soldados cati mictoyaj nochi cati ipati cati quihucayayaj.

11 Huan nopa expa hueyi soldado itoca eliyaya Sama, icone Age, ten altepet Harar. Se tonali mosentilijque se hueyi pamit ten filisteo soldados para quintehuisse israelitame campa itoca Lehi. Huan nochi sequinoc israelita soldados nopona cholojtejque. **12** Huan Sama moquetzqui tatajco se mili ten miyac lentejas huan iseli quintehui huan quimanahui nopa mili huan quinmicti miyac filisteos ipan nopa tonali. Tahuel quintanqui, pampa TOTECO quipalehui.

13 Se tonali quema pixquisti, nopa filisteo soldados mosentilijtoyaj ipan tamaya mit Refaim huan campa hueli pixcayayaj. Nojquiya calactoyaj miyac filisteo soldados ipan altepet Belén, **14** huan huajca David mocahuayaya ipan nopa ostot nechca Adulam pampa más temachti. Huan nopena hualajque quipaxalocoj eyi soldados ten nopa 30 itayacanca soldados David cati más motemacayayaj. **15** Huan David quiijito: “¡Nelía cuali elisquia para niquis se quentzi ten nopa cuali at ten ne ameli cati eltoc iteno nopa caltemit para calaquis ipan Belén!”

16 Huajca nopa eyi tacame cati nelmotemacayayaj quisque huan quiixcotonque campa itzttoyaj nopa filisteos huan qui-quixtijque at ipan nopa ameli nechca altepet Belén huan quihuiquilijque David. Huan ya mocueso ica cati quiijtojtoya huan amo quiic. San quitoyajqui talchi iixpa TOTECO quej se tacajcahualisti. **17** Huan quiijito: “TOTECO, ¿quenicanza niquisquia ni at? Elisquia quej niquisquia inieso ni tacame cati motemacaque para techcuilitoj, pampa huelis mictosquíaj san por cati niquijito.”

Quej nopa motemacayayaj ni eyi tacame cati quipaxalotoj David.

18 Huan Abisai, iicni Joab huan icone Sarvia, quinnahuatiyaya nopa 30 tacame

cati más motemacayayaj ipan tatehuilisti. Se tonali iseli moixnamijqui ica 300 icu-lanceaitacahua huan quinmicti ica icuachoso. Yeca ya nojquia hueyi quej nopa achtohui eyi cati niqintocaxti para más motemacayayaj ten isoldados David. 19 Abisai eliyaya más hueyi que nopa 30 huan yeca mochijqui inintayacanca. Huan nochí quiixmatque Abisai para hueyi, pero amo eliyaya se ten nopa eyi cati más taixmatilme.

20 Huan Benaía, icone Joiada, ten altepet Cabseel eliyaya se tacat cati tahuel motemacayaya. Ipan tali Moab quinmicti ome iconehua Ariel cati eliyayaj huejcapantique. Huan se tonali quema tasehue-tziyaya quipanti se tecuani cati itoca león huan quimicti ipan se ostot. 21 Huan seyoc huelta Benaía quihiucayaya se cuahuit huan pejqui quitehuía se tacat huejcapan-tic ten tali Egipto huan nopa tacat quihiucayaya icuachoso huehueyac imaco. Huan Benaía quiqxtili icuachoso huan ica qui-micti. 22 Tamanti quej ni quichijtihualaya-ya Benaía, huajca nojquia nochí quiix-matque para hueyi quej nopa eyi tacame pampa tahuel motemacaque. 23 Pero amo eliyaya se ten injuanti. Pero nopa 30 sol-dados cati tahuel motemacayayaj quitepa-nitaque miyac Benaía. Huan David quite-quitali ma quinnahuati isoldados cati itz-toyaj ihuaya ya para quimocuitahuise.

Nopa soldados cati más motemacayayaj

24 Ipan nopa 30 soldados cati más mo-temacayayaj itztoyaj ya ni:

Asael, iicni Joab,
Elhanán, icone Dodo, ten altepet Be-lén,

- 25 Sama ten altepet Harod,
Elica ten altepet Harod,
- 26 Heles ten altepet Palti,
Ira, icone Iques, ten altepet Tecoa,
- 27 Abiezer ten altepet Anatot,
Mebunai ten altepet Husah,
- 28 Salmón ten altepet Ahoh,
Maharai ten altepet Netofa,
- 29 Heleb, icone Baana, ten altepet Netofa,
Itai, icone Ribai, ten altepet Gabaa
ipan inintal iixhuihua Benjamín,

- 30 Benaía ten altepet Piratón,
Hidai cati ehuayaya campa itaixtemo-lis Tepet Gaas,
- 31 Abi Albón ten altepet Arba,
Azmavet ten altepet Bahurim,
- 32 Eliaba ten altepet Saalbón,
Jonatán, se icone Jasén,
- 33 Sama ten altepet Arar,
Ahíam, icone Sarar, cati nojquia-hualajqui ten altepet Arar,
- 34 Elifelet, icone Ahasbai, ten altepet Maaca,
Eliam, icone Ahitofel, ten altepet Gi-lo,
- 35 Hezrai ten altepet Carmel,
Paarai ten altepet Arba,
- 36 Igal, icone Natán, ten altepet Soba,
Bani, ten altepet Gad,
- 37 Selec ten altepet Amón,
Naharai ten altepet Beerot (cati eliya-ya itamocuitahuijca Joab, icone Sarvia),
- 38 Ira ten altepet Itra,
Gareb ten altepet Itra,
- 39 huan Urías, nopa heteo tacat.
Huajca ica nochí eliyayaj 37 isoldados David cati más motemacayayaj para tate-huise.

David quinphua nopa israelitame

(1 Cr. 21:1-17)

24 Huan TOTECO sempa cuanqui ini-huaya nopa israelitame, huan qui-chijqui David ma quinphua nochí isoldados ipan itanahuatilis ipan tali Israel huan Judá. 2 Huajca David quinahuati Joab, no-pa tayacanquet ten isoldados, quiilhui:

—Xiya ipan nochí huejhueyil familias ten israelitame ten tali Dan ica huejcpa hasta altepet Beerseba ica tatzinta, huan xijtana-na se censo para njmatis quesqui tacame itztoque cati tetique para tatehuise.

3 Huan Joab quinanquili David:

—TOTECO moDios ma mitzcahuili tiitz-tos miyac xihuít más para tiquitas quen-i-catzá Toteco quinmiyaquilis mosoldados cien huetlas más que cati ama eltoc, pero amo quinamiqui para timohueyimatis quema tijmatis para tahuel miyauqui mo-soldados.

⁴Pero Tanahuatijquet David amo qui-tacaquili huan amo quinchihuili cuenta nopa sequinoc tayacanani ten isoldados, huan quijito para ma mochihua nopa cen-so. Huajca Joab huan nochí nopa tayaca-nani ten soldados quisque iixpa nopa ta-nahuatijquet huan yajque quinijcuilotoj nochí nopa israelita tacame. ⁵Huan achto-hui quiixcotonque hueyat Jordán huan pejque quinijcuilohuaj tacame ipan alte-pet Aroer, huan teipa ipan nopa altepet cati eltoc tatajco nopa tamayamit, huan teipa yajque ipan altepeme Gad huan Ja-zer. ⁶Teipa yajque ipan tali Galaad huan Cades ipan inintal nopa heteo masehual-me, huan teipa ajsitoj ipan tali Dan ica huejcpa. Huan sempa quichijque se huel-ta huan hualajque ipan pilaltepetzitzí nechca altepet Sidón. ⁷Huan teipa ajsicoj ipan altepet Tiro huan ipan nochí nopa al-tepeme ten nopa heveo huan cananeo ma-sehualme, huan para tamise ajsicoj ipan altepet Beerseba ica tatzinta ipan tali Judá. ⁸Huan quema tanqui chicnahui metzti huan 20 tonati para tajcuilojten-que ipan nochí altepeme ten israelitame, injuanti tanque inintequi huan tiauepilij-que ipan altepet Jerusalén. ⁹Huan Joab quiilhui Tanahuatijquet David quesqui ta-came moijcuilojque. Huan ipan tali Israel eliyayaj 800 mil tacame cati noja tetique para tatehuise ica teposti huan ipan tali Judá 500 mil.

¹⁰Teipa quema ya tantoyaj quitananaj nopa censó, David moyolqueso pampa quinpojtoya imasehualhua. Huajca mota-tajti ica TOTECO huan quiilhui:

—TOTECO, nitajtacolchijtoc miyac mo-ipa pampa niquinpojtoc nopa tacame. TOTECO, nimitztajtánia techtapojpolhui, pampa nieliyaya tahuel nihuihuitic para njichihuas ni tamanti cati njichijtoc.

¹¹Huan ipan seyoc tonali ica ijnaloc Toteco quinojnotzqui itajtolpanextijca, Gad, cati Toteco quitequihuiyaya para quicamanalhuis David huan quiilhui: ¹²“Xiya huan xiquilhuiti David para mo-nequi ma quitapejpeni taya yaya quine-qui ten ni eyi tamanti tatzacuiltli cati nijtencahuilía para njichihuas.” ¹³Huaj-

ca yajqui Gad campa ichaj David huan quiilhui:

—Monequi timoilhuis huan tijtapejpe-nis taya tatzacuiltli tijnequi, huan na nitacuepilis huan niquilhuis Toteco cati techilhuis. ¿Tijnequi ma onca chicome xi-huit ten mayanti ipan nochí mortal? O ¿tij-nequi mocualancaitaca ma mitzquixtiji-nemi para eyi metzti huan ticholojtinemis iixpa? O ¿tijnequi para ma huala se hueyi cocolisti cati tahuel tamahua para eyi to-nati ipan nochí mortal?

¹⁴Huan David quinanquili:

—Tahuel nimocuesohua. ¿Quenicatzá huelis njmatis catijqui más cuali para to-juanti? Ma tihuetzica imaco TOTECO huan tijselise nopa hueyi cocolisti, pampa yaya hueyi itaicnelil. Pero ma amo tihuetzica inimaco tocualancaitacahua.

¹⁵Huajca TOTECO quitianqui se co-colisti cati tahuel fiero ipan nochí israel-itame ten Dan ica huejcpa hasta altepet Beerseba ica tatzinta. Pejqui ica ijnaloc se tonali huan quej nopa elqui eyi tonati, huan mijque 70 mil israelitame. ¹⁶Huan quema nopa iilhuicac ejca TOTECO cati temictiyaya quixitajqui imax para temic-tis ipan Jerusalén, TOTECO moyolcuet-qui huan quiilhui: “San ya nopa, ayecmo xitemicti.”

Huan nopa ilhuicac ejquet itztoya ipan nopa piso campa quihuitequiyaya itrigo nopa jebuseo tacat cati itoca Arauna.

¹⁷Huan David quiitac iilhuicac ejca TO-TECO huan motatajti ica TOTECO huan qui-ijo:

—Na cati nitajtacolchijtoc, techtatz-a-cultli na. Ni nomasehualhua cati itztoque quej nopolborregojhua, amo teno quichij-toque. Se favor, techtatzaculti san na huan nochan ehuani.

David quichijqui se taixpamit

(1 Cr. 21:18-27)

¹⁸Huajca Gad hualajqui quiitaco David nopa tonali ica se camanali ten TOTECO huan quiilhui: Xiya ital Arauna, se jebuseo tacat, campa nopa piso campa quihuitequi itrigo, huan xijchihua se taixpamit para TOTECO.

19 Huajca David yajqui quej TOTECO quilhijtoya itajtolpanextijca, Gad, para ma quichihua. **20** Huan quema Arauna quiitac para monechcahuiyayaj campa ya, Tanahuatijquet David huan nochí itequipanojchahua, yajqui quinnamiquito huan mohuijtzonqui hasta talchi iixpa, **21** huan quiilhui:

—Tinotanahuatijca, ¿para ten tihualajtoc para techpaxalos?

Huan David quinanquili:

—Nijnequi nimitzcohuilis motal campa tijhuitequi trigo para njchihuas nopona se itaixpa TOTECO para ma tamis nopa cocolisti cati fiero.

22 Huan Arauna quinanquili:

—Notanahuatijca, ximocuili para elis moaxca nochí cati monequi. Nica itztoque torojme para tiquinmictis para tacajcahualisti. Nojquia nochí ni cuahuit cati njitequihuía para njhuitequi trigo. Nojquia eltoc nopa cuahuit cati nopa torojme quihuicayayaj ipan ininquechta quema tapoxoniyayaj san sejco. Nochí xijtequihui para tit para tijtatis nopa tacajcahualisti. **23** Nochí san nimitzmaca. TOTECO moDios ma quipacti nopa tacajcahualisti cati tijmacas.

24 Pero Tanahuatijquet David quiilhui:

—¡Amo! Amo nijselis quej se nemacti.



Quihuitequiyayaj trigo ica huacaxme.

Na nimitzcohuilis quej quinamiqui ipati, pampa amo njnequi njimacas TOTECO no-Dios se tacajcahualisti cati amo teno ica niquixtajtoc.

Huan David quicohuili nopa lugar campa quihuitequiyaya trigo inihuaya nopa huacaxme huan nopa cuahuit, huan quitaxtahui 50 plata tomi. **25** Huan David qui-chijqui se taixpamit nopona huan quimacac TOTECO tacajcahualisti tatatili huan tacajcahualisti para ica moyoltalise ihuaya. Huan TOTECO quitacaquili cati David quitajtaniyaya, huan huajca tanqui nochí nopa fiero cocolisti ipan Israel.